

宋史

卷二百六十六之七十一



CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JUL 30 1936

454

T2455/21



Harvard College Library Imaging Services <http://imaging.harvard.edu>

CM 0	1	2	3	4	5	6	7	8	9	10	11	12	13	14	15	16	17
Lab D50 2	95/0/2	81/0/0	66/0/0	51/0/1	35/0/0	20/0/0	29/19/54	55/-39/33	40/9/-43	52/48/17	82/4/79	51/50/-13	50/-28/-29	73/19/68			
	38/14/16	66/16/18	50/-5/-22	43/-14/21	55/-9/-25	71/-32/0	62/34/60	40/9/-43	52/48/17	31/21/-21	72/-23/57	73/19/68					

列傳卷第二十五

宋史二百六十六

本朝大學漢和

開府儀同三司程國錄國事前書丞相監修國史領經筵事都總裁脫等奉

勅修

錢若水

從弟若冲

蘇易簡

郭贄

李至

辛仲甫

王沔

温仲舒

王化基

子舉正舉元孫詔

錢若水字澹成一字長卿河南新安人父文敏漢青

州帥劉銖辟為錄事參軍歷長水鄆都尉扶風令相

州錄事參軍先是府帥多以筆牘私取官庫錢韓重

贄領節制頗仍其弊文敏不從重贄假他事廷責之

文敏不爲屈太祖嘉其有守授右贊善大夫知瀘州
召見講武殿謂曰瀘州近蠻境尤宜綏撫聞知州郭
思齊監軍郭重遷掎歛不法恃其荒遠謂朝廷不知
爾至爲朕鞠之苟一毫有侵於民朕必不赦至郡有
政迹夷人詣闕借留詔改殿中丞許再任三遷司封
員外郎又知洛州建昌軍卒年七十二若水幼聰悟
十歲能屬文華山陳搏見之謂曰子神清可以學道
不然當富貴但忌太速爾雍熙中舉進士釋褐同州
觀察推官聽決明允郡治賴之淳化初寇準掌選薦
若水洎王扶程肅陳克錢熙五人文學高第召試翰

林若水最優擢秘書丞直史館歲餘遷右正言知制
誥會置理檢院於乾元門外命若水領之俄同知貢
舉加屯田員外郎詔詣原鹽等州制置邊事還奏合
旨翊日改職方員外郎翰林學士與張洎並命俄知
審官院銀臺通進封駁司嘗草賜趙保忠詔有云不
斬繼遷開狡兔之三穴潛疑光嗣持首鼠之兩端太
宗大以爲當至道初以右諫議大夫同知樞密院事
真宗卽位加工部侍郎數月以母老上章求解機務
詔不許若水請益堅遂以本官克集賢院學士判院
事俄詔修太宗實錄若水引柴成務宗度吳淑楊億

宋史及傳卷二十五
同修成八十卷真宗覽書流涕錫賚有差初太宗有
畜犬甚馴常在乘輿左右及崩鳴號不食因送永熙
陵寢李至嘗詠其事欲若水書之以戒浮俗若水不
從呂端雖爲監修以不泄局不得署名至挾其事以
爲專美若水稱詔旨及唐朝故事以折之時議不能
奪旣又重修太祖實錄參以王禹偁李宗諤梁顥趙
安仁未周歲畢安仁時爲宗正卿上言夔王於太宗
屬當爲兄實錄所紀繆誤若水援國初詔令廷諍數
四乃定俄判吏部流內銓從幸大名若水陳禦敵安
邊之策有曰孫武著書以伐謀爲主漢高將將以用

法爲先伐謀者以將帥能料敵制勝也用法者以朝
廷能賞罰不私也今傅潛領雄師數萬閉門不出坐
視邊寇俘掠生民上孤委注之恩下挫鉉師之氣蓋
潛輩不能制勝朝廷未能用法使然也軍法臨陣不
用命者斬今若斬潛以徇然後擢如楊延朗楊嗣者
五七人增其爵秩分授兵柄使將萬人間以強弩分
路討除孰敢不用命哉敵人聞我將帥不用命退則
有死豈獨思遁抑亦來歲不敢犯邊矣如此則可以
坐清邊塞然後變輅還京天威懾於四海矣臣嘗讀
前史周世宗即位之始劉崇結敵入寇敵遣其將楊

衮領騎兵數萬隨崇至高平當時懦將樊愛能何徽等臨敵不戰世宗大陳宴會斬愛能等授偏將十餘人分兵擊太原劉崇聞之股慄不敢出即日遁去自是兵威大振其後收淮甸下秦鳳平關南特席捲爾以陛下之神武豈讓世宗乎此今日禦敵之奇策也若將來安邊之術請以近事言之太祖朝制置最得其宜止以郭進在邢州李漢超在關南何繼筠在鎮定賀惟忠在易州李謙溥在隰州姚內斌在慶州董遵誨在通遠軍王彥昇在原州但授緣邊巡檢之名不加行營部署之號率皆十餘年不易其任立邊功

者厚加賞賚其位皆不至觀察使蓋位不高則朝廷易制任不易則邊事盡知然後授以聖謀來則掩殺去則勿追所以十七年中北邊西蕃不敢犯塞以至屢使乞和此皆陛下之所知也苟能遵太祖故事慎擇名臣分理邊郡罷部署之號使不相統轄置巡檢之名俾遞相救應如此則出必擊寇入則守城不數年間可致邊烽罷警矣俄知開封府時北邊未寧內出手札訪若水以策若水陳備邊之要有五一曰擇郡守二曰募鄉兵三曰積芻粟四曰革將帥五曰明賞罰何謂擇郡守今之所患患在戰守不同心望陛

下選沉厚有謀諳邊事者任爲邊郡刺史令兼緣邊
巡檢許召勇敢之士爲隨身部曲廩膳不充則官爲
支給然後嚴亭障明斥候每得事宜密相報示寇來
則互爲救應齊出討除寇去則不令遠追各務安靜
苟無大過勿爲替移償立微功就加爵賞如此則戰
守必能同心敵人不敢近塞矣何謂募鄉兵今之所
患患在不知敵情望詔逐州沿邊民爲招收軍給與
糧賜蠲其賦租彼兩地之中各有親族使其懷惠來
布腹心彼若舉兵此必預知苟能預知則百戰百勝
矣何謂積芻粟今之所患患在困民力望陛下令緣

邊各廣營田以州郡長官兼其使額每歲秋夏較其
課程立鼓旗以齊之行賞罰以勸之仍縱商人入粟
緣邊儻鎮戍有三年之備則敵人不敵動矣何謂革
將帥今之所患患在重兵居外輕兵居內去歲傅潛
以八萬騎屯中山魏博之間鎮兵全少非鑿輅親征
則城邑危矣望陛下慎選將臣任河北近鎮仍依舊
事節制邊兵未能削部署之名望且減行營之號有
警則暫巡邊徼無事則却復舊藩豈惟不啓戎心况
復待勞以逸如此則不失備邊之要又無舉兵之名
且使重兵不屯一處進退動靜無施不可矣何謂明

賞罰今之所患患在戎卒驕惰臣自知府以來見侍衛殿前兩司送到邊上亡命軍卒人數甚多臣試譏之皆以思親爲言此蓋令之不嚴也平時尚敢如此况臨大敵乎望陛下以此言示將帥俾申嚴號令以警其下古人云賞不勸謂之止善罰不懲謂之縱惡又曰法不可移令不可違臣嘗聞郭進出鎮西山太祖每遣戍卒必諭之曰汝等謹奉法我猶赦汝郭進殺汝矣其假借如此故郭進所至未嘗少劓陛下能鑒前日之事卽今日之元龜也若水又言邊部用兵唯視太白與月爲進退者誠以太白者將軍也星辰

者廷尉也合則有戰不合則無戰合於東則主勝合於西則客勝陛下能用臣言以謹邊備則邊部不召而自來矣太祖臨御十七年間未嘗生事疆場而敵人往往遣使乞和者以其任用得人而備禦有方也陛下苟思兵者凶器戰者危事而不倒持太阿授人以柄則守在四夷而常獲靜勝此備禦之上策也未幾出知天雄軍兼兵馬部署時言事者請城綏州屯兵積穀以備党項邊城互言利害前後遣使數輩接視不能決時已大發丁夫將興其役詔若水自大名馳往視之若水上言綏州頃爲內地民賦登集尚須

旁郡轉餉自賜地趙保忠以來人戶凋殘若復城之
卽須增戍芻糧之給全仰河東其地隔越黃河鐵碣
二山無定河在其城下緩急用兵輸送艱阻且其地
險若未葺未完邊寇奔衝難於固守况城邑焚毀片
瓦不存所過山林材木匱乏城之甚勞未見其利復
詣闕而陳其事上嘉納之遂罷役初若水率衆過河
分布軍伍咸有節制深爲戍將推服上謂左右曰若
水儒臣中知兵者也是秋又遣巡撫陝西緣邊諸郡
令便宜制置邊事還拜鄧州觀察使并代經略使知
并州事六年春因疾灸兩足創潰出血數斗自是體

貌羸瘵手詔慰勞之俾歸京師數月始赴朝謁因與
僚友會食僧舍假寢而卒年四十四贈戶部尚書賜
其母白金五百兩子延年甫七歲錄爲太常奉禮郎
若水美風神有器識能斷大事事繼母以孝聞雅善
談論尤輕財好施所至推誠待物委任僚佐總其綱
領無不稱治汲引後進推賢重士襟度豁如也精術
數知年壽不永故懇避權位其死也士君子尤惜之
有集二十卷兄若愚比部員外郎從弟若冲大中祥
符中調河陽令有僕酗酒杖之百數僕挾刀夜潛室
中斷其臂若冲大呼又害其幼子詔磔僕於其門真

宗念若水母老遣使存問賜緡綿羊酒且賜若冲帛三十端補孟州別駕延年後以獻文賜進士出身歷太常博士集賢校理

蘇易簡字太簡梓州銅山人父協舉蜀進士歸宋累任州縣以易簡居翰林任開封縣兵曹參軍俄遷光祿寺丞卒特贈秘書丞易簡少聰悟好學風度奇秀才思敏贍太平興國五年年踰弱冠舉進士太宗方留心儒術貢士皆臨軒覆試易簡所試三千餘言立就奏上覽之稱賞擢冠甲科解褐將作監丞通判昇州遷左贊善大夫八年以右拾遺知制誥雍熙初以

郊祀恩進秩祠部員外郎二年與賈黃中同知貢舉有詔凡親屬就舉者籍名別試易簡妻弟崔範匿父喪克貢奏名在上第又王千里者水部員外郎孚之子協爲孚門生千里預薦上聞坐範及千里罪易簡緣是罷知制誥以本官奉朝請未幾復知制誥三年克翰林學士初易簡克貢宋白掌貢部至是裁七年易簡幼時隨父河南賈黃中來使嘗教之屬辭及是悉爲同列易簡連知貢舉陳堯叟孫何并甲廷試淳化元年丁外艱二年同知京朝官考課遷中書舍人克承旨先是曲宴將相翰林學士皆預坐梁迥啓太

祖罷之又皇帝御丹鳳樓翰林承旨侍從升樓西南
隅禮亦廢至是易簡請之皆復舊制易簡續唐李肇
翰林志二卷以獻帝賜詩以嘉之帝嘗以輕綃飛白
大書玉堂之署四字令易簡榜於廳額易簡會韓仵
畢士安李至等往觀上聞遣中使賜宴甚盛至等各
賦詩紀其事宰相李昉等亦作詩頌美之他日易簡
直禁中以水試歌器上密聞之因晚朝問曰卿所玩
得非歌器耶易簡曰然江南徐邈所作也命取試之
易簡奏曰臣聞日中則昃月滿則虧器盈則覆物盛
則衰願陛下持盈守成慎終如始以固丕基則天下

幸甚會郊祀充禮儀使先是扈蒙建議以宣祖升配
易簡引唐故事請以宣祖太祖同配從之知審官院
言初任京朝官未嘗歷州縣不得擬知州通判詔可
改知審刑院俄掌吏部 遷給事中參知政事時趙
昌言亦參知政事與易簡不協至忿爭上前上皆優
容之未幾昌言出使劔南中路命改知鳳翔府明年
易簡亦以禮部侍郎出知鄧州移陳州至道二年卒
年三十九贈禮部尚書易簡外雖坦率中有城府由
知制誥入為學士年未滿三十屬文初不達體要及
掌誥命頗自刻勵在翰林八年春遇夔絕倫等李沆

後入在易簡下先參知政事故以易簡為承旨錫賚均焉太宗遵舊制且欲稔其名望而後正台輔易簡以親老急於進用因亟言時政闕失遂參大政蜀人何光逢易簡之執友也嘗任縣令坐賂削籍流寓京師會易簡典貢部光逢代人充試以取賀易簡於稠人中屏出之光逢遂造謗書斥言朝廷事且譏易簡易簡得其書以聞逮捕光逢獄且坐棄市易簡以殺光逢非其意居常怏怏母薛氏以殺父執切責之易簡泣曰不謂及此易簡罪也及易簡參知政事召薛氏入禁中賜冠帔命坐問曰何以教子成此令器對

曰幼則束以禮讓長則教以詩書上顧左右曰真孟母也易簡性嗜酒初入翰林謝日飲已微醉餘日多沉湎上嘗戒約深切且草書勸酒二章以賜令對其母讀之自是每入直不敢飲及卒上曰易簡果以酒死可惜也易簡嘗居雅善筆札尤善談笑旁通釋典所著文房四譜續翰林志及文集二十卷藏於秘閣三子曰宿曰壽曰耆大中祥符間皆祿之以官云郭贇字仲儀開封襄邑人乾德中舉進士中首薦太宗尹京因事藩邸太平興國初擢為著作佐郎右贇善大夫俄兼皇子侍講賜緋魚太宗至東宮出戒子

篇命贄注解且令委曲講說以喻諸王三年與劉蕡
張洎王克正同知貢舉遷右補闕與宋白並拜中書
舍人賜金紫五年復與程羽侯陟宋白同知貢舉置
京朝官差遣院凡將命出入受代歸闕官悉考校勞
績銓量才品命贄洎滕中正雷德驥領之七年以本
官參知政事曹彬爲弭德超所誣贄極言救解深爲
宰相趙普所重嘗因論事奏曰臣受不次之遇誓以
愚直上報太宗曰愚直何益於事贄言雖然猶勝姦
邪無何以入料宿醒未解左遷秘書少監知荆南府
府俗尚淫祀屨屨旱盛陳禱雨之具贄始至命悉撤

夫投之江不數日大雨就加左諫議大夫入爲鹽鐵
使時諸路積逋欠犯人雖死猶繫其子孫贄條陳其
事多所蠲貸籍田超拜工部侍郎淳化中知澶州坐
河決免所居官久之起爲給事中復工部侍郎知審
官院通進銀臺封駁司真宗即位拜刑部出知天雄
軍翌日贄入對懇辭上曰全魏之地所寄尤重卿宜
亟去入判太常寺吏部流內銓加集賢院學士判院
事知河南府歸朝獻詩自陳進秩吏部俄兼秘書監
初真宗未出閣贄已授經上嘗至其家後楊可法繼
其任上以爲輔導不及贄嘗稱贄純厚長者至是在

秘府屢賜對詢訪舊事且愍其已老特拜工部尚書翰林侍讀學士作詩賜之有啓發冲言曉典常語東封遷禮部尚書太宗在晉邸時凡製篇咏多令屬和真宗嘗訪其賜本贄集為四卷以獻詔獎之大中祥符三年卒年七十六上以舊學之故特親臨哭之贈左僕射謚文懿錄其子昭度為大理寺丞昭升昭用並大理評事昭允左贊善大夫贄屬文敏速而不雕刻昭度集為三十卷上之賜名文懿集性溫和頗能延譽時雋宋白以文學沉下位贄薦引之遂同掌誥命趙昌言兒時一見器之及掌貢部以為奏名之首

後卒貴顯贄初充賦有聲邑人同在籍中者忌之潛加構毀自是連上不中選洎贄再知貢舉邑人子以明經充薦詔下日悔泣而去贄聞之命其所親召還慰諭俾就舉遂預薦中第然吝嗇切於治生晚節不事事人頗以是少之

李至字言幾真定人母張氏嘗夢八仙人自天降授字圖使吞之及寤猶若有物在胷中未幾生至七歲而孤鞠於飛龍使李知審家幼沉静好學能屬文及長辭華典贍舉進士釋褐將作監丞通判鄂州旋擢著作郎直史館會征太原命督澤潞芻糧累遷右補

闕知制誥太平興國八年轉比部郎中為翰林學士
冬拜右諫議大夫參知政事雍熙初加給事中時議
親征范陽至上疏以為兵者凶器戰者危事用之之
道必務萬全幽州為敵右臂王師所嚮彼必拒張攻
城數萬兵食倍之今日邊庾未充况范陽之傍坦無
陵阜去山既遠取石尤難金湯之堅必資機石儻有
未備願且繕完畜威養銳觀釁以伐謀更縱彌年亦
未為晚必若聖心獨斷在於必行則京師天下之本
陛下恭守宗廟不離京國示敵人以閒暇慰億兆之
仰望策之上也大名河朔之咽喉或暫駐鑾輅揚言

自將以壯軍威策之中也若乃遠提師旅親抵邊陲
北有契丹之虞南有中原之慮則曳裾之懇切斷鞅
之狂愚臣雖不省耻在二賢後也至以目疾累表求
解機政授禮部侍郎進秩吏部會建秘閣命兼秘書
監選三館書置閣中俾至總之至每與李昉王化基
等觀書閣下上必遣使賜宴且命三館學士皆與焉
至是昇秘閣次於三館從至請也上嘗臨幸秘閣出
草書千字文為賜至勒石上曰千文乃梁武得破碑
鍾繇書命周興嗣次韻而成理無足取若有資於教
化莫孝經若也乃書以賜至薦潘慎修舒雅杜鎬吳

淑等入充直館校理請購亡書間以新書奏御必便
坐延見恩禮甚厚淳化五年兼判國子監至上言五
經書既已板行惟二傳二禮孝經論語爾雅七經疏
未修豈副仁君垂訓之意今直講崔頤正孫奭崔偓
佺皆勵精強學博通經義望令重加雋校以備刊刻
從之後又引吳淑舒雅杜鎬檢正譌謬至與李沆總
領而裁處之至道初真宗初正儲位以至與李沆並
兼賓客詔太子事以師傅禮真宗每見必先拜至等
上表不敢當禮詔答曰朕旁稽古訓肇建承章用選
端良資於輔導藉卿宿望委以護調蓋將勗以謙冲

故乃異其禮數勿飾當仁之讓副予知子之心至等
相率謝太宗謂曰太子賢明仁孝國本固矣卿等可
盡心規誨若動皆由禮則宜贊助事有未當必須力
言至於禮樂詩書義有可裨益者皆卿等素習不假
朕之言諭也真宗卽位拜工部尚書參知政事一日
上訪以靈武事至上疏曰河湟之地夷夏雜居是以
先王置之度外繼遷異類騷動疆場然臍不足弭其
患擢髮不足數其罪然聖人之道務屈己含垢以安
億民蓋所損者小所益者大望陛下以元元爲念不
以巨憝介意料彼脅從亦厭兵久矣苟朝廷舍之不

問啖以厚利縻以重爵亦安肯迷而不復訖於淪胥
哉昨鄭文寶絕青鹽使不入漢界禁粒食使不及羗
夷致彼有詞而我無謂此之失策雖悔何追今若復
禁止不許通糧恐非制敵懷遠不戰屈人之意昔唐
代宗雖罪田承嗣而不禁魏鹽陛下宜行此事以安
邊鄙使其族類有無交易售鹽以利之通糧以濟之
彼雖遠夷必然向化互相誥諭一旦懷恩舍逆効順
則繼遷豎子孤而無輔又安能爲我蜂蠆哉今靈州
不可不棄非獨臣愚以爲當然若移朔方軍額於環
州亦一時之權也或指靈州爲咽喉之地西北要衝

安可棄之以爲敵有此不知之甚非臣之所敢知也
後靈武卒不能守咸平元年以目疾求解政柄授武
信軍節度入辭節制不允居二年徙知河南府四年
以病求歸本鎮許之詔甫下卒年五十五贈侍中詔
給其子惟良惟允惟熙等奉終制至嘗師徐鉉手寫
鉉及其弟錯集置於几案又賦五君詠為鉉及李昉
石熙載王祐李穆作也至剛嚴簡重人士罕登其門
性吝嗇幼育於知審及貴即逐其養子以利其資知
審因至亦至右金吾衛大將軍

辛仲甫字之翰汾州孝義人曾祖實石州推官祖迪

壽陽令父藩河東節度判官仲甫少好學及長能吏
事偉姿儀器局沉厚周廣順中郭崇掌親軍領武定
節制署仲甫掌書記顯德初出鎮澶淵仍署舊職崇
所親吏為廂虞候部民有被劫殺者訴陰識賊魁即
捕盜吏也官不敢詰仲甫請自捕逮鞠之吏故稽其
獄仲甫曰民被寇害而使自誣服蠹政甚矣焉用僚
佐為請易吏以雪冤憤崇悟移鞠之乃得實狀崇移
鎮真定改深趙鎮觀察判官太祖受命以崇為監軍
陳思誨密奏崇有姦狀上怒且疑遣中使馳往驗之
未至崇憂懣失據謂賓佐曰苟王人不察為之柰何

皆愕相視仲甫曰皇帝膺運公首効節軍民處置率
循常度且何以加辭第遠偵使者率僚屬盡郊迎禮
聽彼伺察必當自辨矣崇如其言使者至視崇無他
意還奏上大喜歸罪於思誨仲甫又隨崇為平盧軍
節度判官崇卒改鄆齊觀察判官累雪冤枉乾德五
年入拜右補闕出知光州州有橫河與城直會霖潦
暴疾水溢潰廬舍仲甫集船數百艘軍資民儲皆賴
以濟六年移知彭州州卒誘營兵及諸屯戍謀以長
春節宴集日為亂屬春初仲甫出城巡視見壕中草
深意可藏伏命燒薙之兇黨疑謀泄有自首者禽百

餘人盡斬之先是州少種樹暑無所休仲甫課民栽柳蔭行路郡人德之名為補闕邨太祖問群臣文武兼資者為誰趙普以仲甫對徙益州兵馬都監代還選為三司戶部判官太平興國初遷起居舍人奉使契丹遼主問党進何如人如進之比有幾仲甫曰國冢名將輩出如進鷹犬材耳何足道哉遼主欲留之仲甫曰信以成命義不可留有死而已遼主竟不能屈使還以刑部郎中知成都府既至奏免歲輸銅錢罷榷酤政尚寬簡蜀人安之八年加右諫議大夫時彭州盜賊連結為害詔捕未獲仲甫誘令自縛請吏

者凡百餘人餘因散去九年入知開封府拜御史中丞雍熙二年拜給事中參知政事端拱中進戶部侍郎時呂蒙正以長厚居相位王沔任事仲甫從容其間而已淳化二年以足疾罷為工部尚書出知陳州代歸會蜀有寇以仲甫素著恩信將令輿疾招撫以疾未行無何以太子少保致仕真宗即位加太子少傅咸平三年卒年七十四贈太子太保子若冲若虛若蒙若濟若渝皆能其官孫有孚有隣俱中進士王沔字楚望齊州人太平興國初舉進士解褐大理評事四年太宗親征太原見於行在授著作郎直史

館遷右拾遺出爲京西轉運副使明年加右補闕知
懷州八年春與宋白賈黃中等同知貢舉擢膳部郎
中樞密直學士遷右諫議大夫同僉書樞密院事賜
第崇德坊雍熙元年加左諫議大夫樞密副使端拱
初改戶部侍郎參知政事淳化初宰相趙普出守西
洛呂蒙正以寬簡自任政事多決於沔沔與張齊賢
同掌樞務頗不叶齊賢出知代州沔遂爲副使參預
政事陳恕好苛察亦嘗與沔忤淳化二年齊賢洎恕
參知政事沔不自安慮僚屬有以中書舊事告齊賢
等會左司諫王禹偁上言自今宰相及樞密使不得

於本廳見客許於都堂延接沔喜即奏行之直史館
謝泌以爲如此是疑大臣以私也疏駁之太宗追還
前詔沔暨恕因是罷守本官翌日蒙正亦罷沔見上
涕泣不願離左右未幾鬚鬢皆白會省吏事發連中
書因有奏毀者上語毀者曰呂蒙正有大臣體王沔
甚明敏毀者慙而止三年上欲黜陟官吏命沔與謝
泌王仲華同知京朝官考課沔上言應京朝官殿犯
乞令刑部條報以贓及公私罪分三等以聞立法苛
察欲因是以求再用受命甫旬日方視事以暴疾卒
年四十二贈工部尚書沔聰察敏辯有適時之用上

前言事能委曲敷繹每對御讀所試進士辭賦音吐
明暢經讀者多中高第性苛刻少誠信掌機務日凡
謂見者必啗以甘言皆喜過望既而進退非允人胥
怨之沔第淮太平興國五年進士任殿中丞嘗掌香
藥權易院坐賊論當棄市以沔故詔杖一百降定遠
主簿沔以是頻為寇準所詆云

溫仲舒字秉陽河南人太平興國二年舉進士為大
理評事通判吉州再遷秘書丞知汾州坐事除名未
幾復起為右贊善大夫通判睦州端拱初拜右正言
直史館判戶部憑由司三年拜工部郎中樞密直學

士知三班院秋彗星見召對別殿仲舒以為國家平
太原以來燕代之交城守年深殺傷剽掠彼此迭見
大河以北農桑廢業戶口減耗凋弊之餘極力奉邊
丁壯備徭老弱供賦遺廬壞堵不亡即死邪人媚上
猶云樂輸加以兵卒踐更行者辛苦居者怨曠願推
恩宥以綏民庶太宗嘉納之遂赦河北淳化二年拜
右諫議大夫樞密副使改同知樞密院事四年罷知
秦州先是俗雜羗戎有兩馬家朶藏梟波等部唐末
以來居於渭河之南大洛小洛門砦多產良木為其
所據歲調卒采伐給京師必以貲假道於羗戶然不

免攘奪甚至殺掠爲平民患仲舒至部兵歷按諸砦諭其酋以威信諸部獻地內屬旣而悉徙其部落於渭北立堡砦以限之民感其惠爲畫像祠之會有言仲舒生事者上謂近臣曰仲舒嘗總機密之職在吾左右當以綏懷爲務古者伊洛之間尚有羗渾雜居况此羗部內屬素居渭南土著已久一旦擅意斥逐或至騷動又煩吾關右之民乃命知鳳翔薛惟吉與仲舒對易其任連知興元江陵二府加給事中會內侍藍繼宗使秦州還言得地甚利乃召仲舒拜戶部侍郎尋參知政事二砦後爲內地歲獲巨木之利咸

平初拜禮部尚書罷政出知河陽踰年知開封府五年以京府務劇求罷遂以本官兼御史中丞尋遷刑部尚書知天雄軍徙河南景德中并州缺守上以北門重鎮須大臣鎮撫非張齊賢溫仲舒不可令宰相諭旨皆不願往未幾復知審宮院大中祥符中進職戶部尚書三年判昭文館大學士命下卒年六十七贈左僕射諡恭肅仲舒敏於應務少與呂蒙正契厚又同登第仲舒黜廢累年蒙正居中書極力援引及彼任用反攻蒙正士論薄之自爲正言至貳樞密皆與寇準同進時人謂之溫寇子嗣宗嗣良嗣先嗣立

仲舒既卒帝憫其孤弱並祿以官

王化基字永圖鎮定人太平興國二年舉進士爲大理評事通判常州遷太子右贊善大夫知嵐州時趙普爲相建議以驟用人無益于治改淮南節度判官入爲著作郎遷右拾遺抗疏自薦太宗覽奏曰化基自結人主慷慨之士也召試知制誥以右諫議大夫權御史中丞一日侍便殿問以邊事對曰治天下猶植木焉所患根本未固固則枝幹不足憂朝廷治則邊鄙何患乎不安又嘗令薦士卽一疏數十人王嗣宗薛映耿望皆其人也化基嘗慕范滂爲人獻澄清

畧言時事有五其一復尚書省曰國家立制動必法天尚書省上應玄象對臨紫垣故六卿擬喉舌之官郎吏應星辰之位斯實乾文昭著故事具明方今省署名實未稱夫三司使額乃近代權制判官推官勾院開拆磨勅憑由理欠孔自勾押前後行皆州郡吏局之名請廢三司止於尚書省設六尚書分掌其事廢判官推官設郎官分掌二十四司及左右司公事使一人掌一司廢孔自勾押前後行為都事主事令史廢勾院開拆磨勅憑由理欠等司歸比部及左右司如此即事益精詳且盡去州郡吏局之名也六卿

如闕即選名品相近有才望者權之即官如闕則於
兩省三院選名幹有清望者依資除之其二十四司
公事若繁簡不同望下本省府屬參酌其類均而行
之其二慎公舉曰朝廷頻年下詔以類求人但聞例
得舉官未見擇其舉主欲望自今先責朝官有聲望
者各舉所知其舉到官負則置籍并舉主名姓籍之
所舉之官實著廉能則特旌舉主若所舉貪冒敗事
連坐舉主陛下自登寶位十年于茲七經選掄得人
多矣然下僚遠官不無沉滯望令採訪司及州郡長
吏廉察以聞籍以待用則下無遺材矣其三懲貪吏

曰貪吏之於民其損甚大屈法煩刑徇私肆虐使民
之受害甚於木之受蠹若乃用其非人而不繩以法
雖夷齊顏閔不能自見蓋中人之性如水之在器方
負不常顧用之者何如爾望令諸路轉運使副兼採
訪之名責以覺察州府軍監長吏得失俟其澄清部
內則待以不次之擢置於侍從之間所貴周知物理
能備顧問且足為外官之勸也其四省冗官曰古人
建官初不必備者惟得其人也國家封疆雖踰前世
而分設庶官實倍常數意欲盡籠天下之利而民物
轉加凋弊二十年前江淮諸郡楊楚最居要衝務穰

事衆地廣民繁然止設知州一人署領官事其餘通判官推官及州官等悉皆分筦權務倉庫當時事無不集兼少獄訟其後十年臣任揚州時朝廷添置監臨使臣等職實踰本州官數諸州冗員似此非一今以朝官諸色使臣及縣令簿尉等高卑相折而計之一八月費不啻十千以千人約之歲計用十餘萬千更倍萬約之萬又過倍使皆庶吏止縻公帑設或貪夫參錯其間則取於民者又加倍焉望委各路轉運使副與知州同議裁減若縣令簿尉等官自前多不備置可兼者兼之如此則冗官汰矣其五擇遠官曰

負罪之人多非良善貪殘兇暴無所不至若授以遠方牧民之官其或怙惡不悛恃遠肆毒小民罹殃卒莫上訴甚非撫綏遠人之意也若自今以往西川廣南長吏不任負罪之人則遠人受賜矣書奏太宗嘉納之初柴禹錫任樞密有私受人金而禹錫實不知也參知政事陳恕欲因以中禹錫太宗怒引囚訊其事化基爲辨其誣太宗感悟以化基爲長者淳化中拜中丞俄知京朝官考課遷工部侍郎至道三年超拜參知政事咸平四年以工部尚書兼知揚州移知河南府進禮部尚書大中祥符三年卒年六十七贈

右僕射謚惠獻化基寬厚有容喜愠不形僚佐有相
凌傷者輒優容之在中書不以蔭補諸子官然善教
訓故其子舉正舉直舉善舉元皆有所立

舉正字伯仲幼嗜學厚重寡言化基以爲類已器愛
異諸子以蔭補秘書省校書郎進士及第知伊闕任
丘縣館閣校勘集賢校理真宗實錄院檢討國史編
修官三遷尚書度支員外郎直集賢院修三朝寶訓
同修起居注擢知制誥其妻父陳堯佐爲相改龍圖
閣待制堯佐罷以兵部郎中復知制誥爲翰林學士
拜右諫議大夫參知政事前一日吏有馳報者舉正

方燕居齋舍徐謂吏曰安得漏禁中語旣入謝仁宗
曰卿恬於進取未嘗干朝廷以私故不次用卿時陝
西用兵呂夷簡以宰相判樞密院舉正曰判名重不
可不避也乃改兼樞密使遷給事中御史臺舉李徽
之爲御史舉正友婿也格不行徽之訟曰舉正妻悍
不能制如謀國何歐陽修等亦論舉正懦弱不任事
舉正亦自求去遂以資政殿學士尚書禮部侍郎知
許州光化軍叛卒轉寇傍境而州兵有謀起爲應者
舉正潛捕首惡者斬之徙知應天府累遷左丞皇祐
初拜御史中丞乃奏張堯佐庸人緣妃家一日領四

使使賢士大夫無所勸不報舉正因留班廷諍乃奪
宣徽景靈二使又曰先朝用人雖守邊累年者官止
遙郡刺史今所用未盡得人而尅期待遷使後有功
者何所勸耶且轉運使察官吏能否生民休戚賴焉
命甫下而數更不終歲而再易恩澤所以未宣民疾
所以未瘳者職此故也御史唐介坐言事貶春州舉
正力言之介得徙英州居半歲堯佐復爲宣徽使家
居凡七上疏及狄青爲樞密使又言青出兵伍不可
爲執政力爭不能奪因請解言職帝稱其得風憲體
遣賜就第賜白金三百兩除觀文殿學士禮部尚書
知河南府入兼翰林侍讀學士每進讀及前代治亂
之際必再三諷諭以太子少傅致仕卒贈太子太保
諡安簡賜黃金百兩文章雅厚如其爲人有平山集
中書制集內制集五十卷

舉元字懿臣以上父章賜進士出身知潮州江水敗
隄盜乘間竊發舉元夜召里豪計事盜旣獲乃治隄
爲河陰發運判官或言大河決將犯京師舉元適入
對具論地形證其妄已而果然歷郡牧戶部判官京
東轉運使沙門島多流人守吏顧貨橐陰殺之舉元
請立監以較賞罰自是全活者衆徙淮南河東夏人

來爭屈野地舉元從數騎度河設幕與之議示以赤
心夏人感服治平中又徙成都邛井鹽歲入二百五
十萬爲丹稜卓箇所侵積不售下令止之鹽登於舊
召提舉在京修造英宗勞之曰官廬舍害於水僅有
存者卿究心公家毋憚其勞俄進鹽鐵副使拜天章
閣待制知滄州改河北都轉運使知永興軍慶人夏
人屯境上有窺我意舉元使二裨將以千騎扼其要
害長安遣從事來會兵涇原戒勿輕舉大將竇舜卿
銳意請行不聽舉元曰不過三日虜去矣至期果去
神宗以細札諮攻守策舉元請省官減戍益備去兵
勿營亭障輿論不合遂引疾求解徙陳州未行而卒
官至給事中年六十二子詔

詔字景獻用蔭補官通判廣信軍事知博州魏俗尚
椎剽姦盜相囊橐詔請開反告殺并贖罪法以携其
黨元祐初朝廷起回河之議未決而開河之役遽興
詔言河朔秋潦水淫爲苗民人流徙賴發廩振贍思
稍蘇其生謂宜安之未可以力役傷也從之擢開封
府推官富民貸後絕僧牒爲緡錢十三萬踰期復責
倍輸身死貲籍又錮其妻子詔請免之出爲滑州州
屬縣有退灘百餘頃歲調民刈草給河隄民病其役

詔募人佃之而收其餘爲度支郎中使契丹時方討西夏迓者耶律誠欲嘗我言曰河西無禮大國能容之乎詔曰夏人侮邊旣正其罪矣何預兩朝和好事入賀故事跪而飲蓋有誤拜者乃彊詔詔曰南北百年所守者禮其可紛更耶卒跪飲之崇寧中由大理少卿爲卿徙司農御史論詔在滁日請蘇軾書醉翁亭碑罷主崇福宮旋知汝州鑄錢卒罵大校詔斬以拘而上章待罪除直秘閣言者復挾滁州事罷去起知深兗二州徙同州過闕留爲左司郎中遷衛尉太府卿刑部侍郎詳定敕令舊借緋紫者不佩魚詔言

章服所以辨上下今與胥吏不異遂皆佩魚歷工兵戶三部侍郎轉開封尹時子璿使京西攝尹洛父子兩京相望人以爲榮進刑部尚書拜延康殿學士提舉上清寶籙宮復爲工部尚書徽宗閱其老命母拜詔皇恐於是但朝朔望俄以銀青光祿大夫致仕卒年七十九

論曰自昔參大政贊機務非明敏特達之士不能勝其任若又飭以文雅濟以治具則盡善矣若水機墜明敏儒而知兵李至剛嚴簡重好古博雅其於柄用宜矣王沔臨事精密能遠私謁而考課之議頗傷苛

刻仲甫以吏事為時用未免苟容之誚瑕瑜固不相掩也仲舒見舉於蒙正而反攻其短易簡不能周恤光逢而置之死地其不可與郭贇辨曹彬之誣化基伸禹錫之枉同日而語也明矣此純厚長者之稱所以獨歸於二子歟舉正繼踐台佐得風憲體舉元任職邊郡有持重稱矧詔之父子又並尹兩京克濟其美何王氏子孫之多賢也

列傳卷第二十五

列傳卷第二十六

宋史二百六十七

開府儀同三司柱國錄軍國軍事前書右丞相監修國史領經筵事都總裁

勅修

張宏

趙昌言

陳恕

魏羽附

劉昌言

張洎

李惟清

張宏字巨卿青州益都人高祖茂昭唐益定節度使曾祖玄易州刺史祖持蒲城令父峭業春秋一舉不第退居丘園後唐天成中以賢帥後補協律郎至平利令宏太平興國二年舉進士為將作監丞通判宣州改太子中允直史館遷著作郎賜緋魚預修太平

御覽歷左拾遺六年出為峽路轉運副使就加左補
闕會省副使知遂州以勤幹聞入為度支員外郎雍
熙中呂蒙正李至張齊賢王沔薦其文行政主客郎
中史館修撰數日以本官充樞密直學士賜金紫太
宗召對便殿謂曰成都重地卿為朕鎮之因厚賜以
遣至鄭州促召歸闕拜右諫議大夫樞密副使會太
宗親試禮部不合格貢士令樞密院給牒因謂宏曰
朕自御極以來親擇群材大者為棟梁小者為榱桷
卿與呂蒙正皆中朕選大臣頗有沮議非朕獨斷豈
能及此乎宏頓首謝時河朔用兵宏居位無所建白

御史中丞趙昌言多言邊事乃以昌言副樞密宏為
中丞兩更其職端拱初改工部侍郎再為樞密副使
淳化二年以吏部侍郎罷俄判吏部銓權知開封府
太宗御便殿慮囚以府獄多壅詔劾其官屬宏等頓
首請罪乃釋之真宗尹京宏罷奉朝請至道初出知
潞州二年就轉右丞真宗即位加工部尚書咸平
初還朝知審官院通進銀臺封駁司二年真宗以上
封者衆慮其稽留命宏與王旦知登聞鼓院再掌吏
部選四年卒年六十三廢朝贈右僕射命中使泣葬事
錄其子可久大理評事可道太祝可度奉禮郎宏循

謹守位不求赫赫之譽歷踐通顯未嘗敗事可久至
虞部員外郎可道國子博士可度太子中舍

趙昌言字仲謨汾州孝義人父獻從事使府太宗尹
開封選為雍丘太康二縣令後終安申觀察判官昌
言少有大志趙逢高錫寇準皆稱許之太平興國三
年舉進士文思甚敏有聲於場屋為貢部首薦廷試
日太宗見其辭氣俊辯又觀其父名謂左右曰是嘗
為東畿宰朕之生辰必獻詩百韻為壽善訓其子亦
為可嘉也擢寘甲科為將作監丞通判鄂州拜右拾
遺直史館賜緋魚選為荆湖轉運副使遷右補闕會

省副職改知青州入拜職方員外郎知制誥預修文
苑英華雍熙初加屯田郎中明年同知貢舉俄出知
天雄軍時曹彬崔彥進米信失律于岐溝昌言遣觀
察支使鄭蒙上疏請誅彬等優詔褒荅召拜御史中
丞太宗宴金明池特召預焉憲官從宴自昌言始也
河東用兵樞密副使張宏循默守位昌言多條上邊
事太宗即以昌言為左諫議大夫代宏為樞密副使遷
工部侍郎時鹽鐵副使陳象輿與昌言善知制誥胡
旦度支副使董儼皆昌言同年右正言梁顥嘗在大名
幕下四人者日夕會昌言之第京師為之語曰陳三

更董半夜有傭書程穎性險誕與旦狎旦為作大言之辭使穎上之為穎改姓名周馬以為唐馬周復出也其言多毀時政自薦為大臣及歷舉數十人皆公輔器期昌言為內應陳王尹開封廉知以聞詔捕穎繫獄鞠之盡得其狀昌言坐貶崇信軍節度行軍司馬穎杖脊黥面流海島禁錮終身初太宗厚遇昌言垂欲相之趙普以勲舊復入惡昌言剛戾乃相呂蒙正裁數月會有穎獄普以昌言樹黨再勸太宗誅之太宗特寬焉淳化二年起昌言知蔡州逾年召拜右諫議大夫或議弛茶鹽禁以省轉漕命昌言為江淮

兩浙制置茶鹽使昌言極言非便太宗不納趣昌言往昌言固執如初即以戶部副使雷有終代之卒以無利而罷昌言復知天雄軍賜錢二百萬大河貫府境豪民峙芻交圖利誘姦人潛穴隄防歲仍決溢昌言知之一日隄吏告急命徑取豪家厝積以給用自是無敢為姦利者屬澶州河決流入御河漲溢浸府城昌言籍府兵負土增隄數不及千乃索禁卒佐役皆偃蹇不進昌言怒曰府城將墊人民且溺汝輩食厚祿欲坐觀耶敢不從命斬衆股慄赴役不浹旬城完太宗手詔褒諭之召拜給事中叅知政事俾乘疾

置以入即赴中書時京城連雨昌言請出廐馬分牧外郡或以盛秋備敵馬不可闕昌言曰塞下積水敵必不至太宗從之未幾王小波李順搆亂于蜀議遣大臣撫慰昌言獨請發兵無使滋蔓廷論未決會嘉眉連陷始命王繼恩等分路進討昌言攝祭太廟宿齋中因召對滋福殿復贊安計遂遣使督繼恩戰繼恩御衆寡術餘寇未殄握兵留成都士無鬪志郡縣復有陷者太宗意頗厭兵召昌言謂曰西川本自一國太祖平之訖今三十年矣昌言知意即前指畫攻取之策太宗喜命昌言為川峽五十二州招安行營

馬步軍都部署昌言懇辭敦諭不許賜精鎧良馬白金五千兩別賜手札數幅皆討賊方畧自繼恩以下並受節度既行有奏昌言無嗣鼻折三根頗有反相不宜遣握兵入蜀後旬日召宰相於北苑門曰昨令昌言入蜀朕思之有所未便且蜀賊小醜昌言大臣未易前進且令駐鳳翔止遣內侍衛紹欽齎手書指揮軍事亦可濟也詔書追及昌言已至鳳州留候館百餘日賊平改戶部侍郎罷政事知鳳翔府徙澶涇延三州真宗即位遷兵部侍郎知陝州表求還京不許未幾移知永興軍咸平三年與呂蒙正寇準同召

以本官兼御史中丞知審官院有言門資官不宜任親民昌言手疏以才不才在人豈以寒雋世家為限遂罷其議加工部尚書仍兼中丞先時多遣臺吏巡察群臣踰越法式者昌言建議請準故事令左右巡使分領之會知審刑院趙安仁判大理寺韓國華斷獄失中解職昌言因上言詳斷官宜加慎擇自今有議刑不當嚴示懲罰授以遠官若有罪被問不即引伏者許令追攝又天下大辟斷訖皆錄款聞奏付刑部詳覆用刑垂理者皆行按劾惟開封府未嘗奏案或斷獄有失止罪元勘官吏知府判官推官檢法官

皆不及責則何以辯明枉濫表則方夏望自今如外州例施行從之會孟州民常德方訟臨津尉任懿以賄登第事下御史乃知舉王欽若受之昌言以聞欽若自訴詔邢昺覆案坐昌言故入奪官貶安遠軍行軍司馬移武勝軍景德初拜刑部侍郎求兼三館職命判尚書都省真宗幸澶淵以盟津居要增屯兵命知河陽歷知天雄軍府境內有小盜昌言榜諭能告執者給賞牙吏即遷職樞密使王繼英以為小盜不當擅為賞格乃訪昌言易其榜有勞者俟朝旨未幾徙知鎮州遷戶部侍郎大中祥符二年卒年六十五

贈吏部尚書謚曰景肅錄其子慶嗣為國子監丞賦
祿終喪姪孫允明同學究出身昌言喜推獎後進掌
漕湖外時李沆通判潭州昌言謂有台輔之量表聞
于朝王旦宰岳州平江昌言一見識其遠大以女妻
之後皆為賢相王禹偁自卑秩擢詞職亦昌言所薦
也昌言強力尚氣槩當官無所顧避所至以威斷立
名雖屢經擯斥未嘗少自抑損然剛愎縱率對僚吏
倨慢時論以此少之慶嗣至太子洗馬

陳恕字仲言洪州南昌人少為縣吏折節讀書江南
平禮部侍郎王明知洪州恕以儒服見明與語大奇
之因資送令預計偕太平興國二年進士解褐大理
評事通判洪州恕以鄉里辭改澧州澧自唐季為節
鎮兼領吏多緣簿書輒沒為姦恕盡摘發其弊郡中
稱為強明以吏幹聞召入為右贊善善大夫同判三司
勾院遷左拾遺充度支判官與判使王仁贍庭爭本
司事仁贍屈伏坐貶秩擢恕為度支員外郎仍舊職
再遷工部郎中知大名府時契丹內寇受詔增浚城
隍其器用取於民者不時集恕立擒府中大豪一人
會將吏將斬之宗族號愬賓佐競前請救大豪叩頭
流血請翌日集事違期甘死恕令械之以徇民皆恐

慄無敢後期者數日功就會契丹引去召入爲戶部
郎中戶部副使遷右諫議大夫知澶州驛召爲河北
東路營田制置使太宗諭以農戰之旨恕對曰古者
兵出於民無寇則耕寇至則戰今之戎士皆以募致
衣食仰給縣官若使之冬持兵禦寇春執耒服田萬
一生變悔無及矣太宗曰卿第行朕思之恕行數日
果有詔止令修完城堡通道溝瀆而已營田之議遂
寢俄知代州入判吏部選事拜監鐵使恕有心計釐
去宿弊太宗深器之親題殿柱曰真鹽鐵陳恕遷給
事中叅知政事數月太宗言及戶部使樊知古所部

不治恕與知古聯事情好款洽密與語之欲知古修
舉其職知古懇於太宗太宗怒恕泄禁中語罷守本
官旋出知江陵府大發群吏姦賊坐徒流停廢者甚
衆郡內惕息淳化四年太宗從魏羽段惟一之請分
三司爲十道置左右計使以魏羽董儼分主之召恕
爲工部侍郎充總計使判左右計事左右計使分判
十道事凡議論計度並令恕等叅預恕以官司分隸
政令互出難以經久極言其非便歲餘果罷復以恕
爲鹽鐵使時太宗留意金穀召三司吏李溥等二十
七人對於崇政殿詢以計司利害溥等言條目煩多

不可以口占願給筆札以對太宗遣中黃門送詣相
府限五日悉條上之溥等共上七十一事詔以四十
四事付有司行之其十九事下恕等議可否遣知雜
御史張秉中使張崇貴監議令中書籍其事專檢舉
之無致廢格賜溥等白金緡錢悉補侍禁殿直領其
職太宗謂宰相曰溥等條奏事頗有所長朕嘗語恕
等若文章稽古此輩固不可望若錢穀利病頗自幼
至長寢處其中必周知根本卿等但假以顏色引令
剖陳必有所益恕等剛強終不肯降意詢問呂端對
曰耕當問奴織當問婢寇準曰夫子入太廟每事問

乃以貴下賤先有司之義後數日太宗又曰國家歲
入財數倍於唐唐中葉以降藩鎮擅命征賦多不入
公家下陵上替經制隳壞若前代為得即已致太平
豈復煩朕心慮也因召恕等責以職事曠廢恕等對
曰今土宇至廣庶務至繁國用軍須所費浩瀚又遇
諸州凡有災沴必盡蠲其租臣等每舉權利朝廷必
以侵民為慮皆尼而不行縱使耿受昌桑弘羊復生
亦所不逮臣等駑力惟盡心薄領終不足上裨聖治
太宗曰卿等清而不通專守繩墨終不能為國家度
長挈大剖煩折滯只如京城倉庫主吏當改職者簿

領中壹處節目未備即至十年五年不決以致貧無
資給轉徙溝壑此卿等之過豈不傷和氣哉恕等頓
首謝五年賜三司錢百萬募吏有能言本司不便者
令恕等量事大小以錢賞之錢盡更給至道二年欲
併三司命官總判其勾院磨勘理欠憑由支收行帳
提點等司令恕條列其事以聞恕奏曰伏以封域寔
廣財穀繁多三司之中簿牒填委朝廷設法督責尤
嚴官吏救過不暇若爲三部各設主司擇才非難辦
事亦易事辦過鮮不撓上心此亦一時之良策也其
勾院磨勘兩司出於舊制關防之要莫加於此理欠

憑由三司雖非舊設自理欠失序憑由散落故設二司
專令典掌綱目咸具制置有倫逋欠無失理之名憑
由鮮流散之弊實亦要切不可廢除若兩司併委一
官方及判官一員之事其主轄支收司先因從京支
度財貨轉輸外地此除彼附照驗稽滯若京城得賢
主吏使居此司專行檢轄凡支撥官物便給除破文
憑却於所司置簿記錄催到收附文記即乃勾銷簿
書取捷之門亦爲允當其行帳司近日權置了絕舊
帳帳目告盡司額自除提點司是中旨特置提振三
司廢怠之事固非有司敢得擬議也詔三司都憑由

理欠司宜令為一處命官兼判應諸道逋負官物令
三司逐部理約理欠司但總其所逋之數糾督之餘
悉從恕奏恕將立茶法召茶商數十人俾各條利害
恕閱之等為三等語副使宋大初曰吾觀下等固減
裂無取上等取利太深此可行於商賈不可行於朝
廷惟中等公私皆濟吾裁損之可以經久於是始為
三法行之貨財流通峽路諸州承孟氏舊政賦稅輕
重不均閬州稅錢千八百為一絹果州六百為一絹
民前後擊登聞鼓陳訴歷二十年詔下本道官吏因
循不理轉運副使張曄年少氣銳會受詔按覆即便

宜行之恕奏曄擅改法計果州一歲虧上供絹萬餘
曄坐削一任免恕每便殿奏事太宗或未深察必形
請讓恕歛板蹶縮退至殿壁負立若無所容俟意稍
解復進懋執前奏終不改易如是或至三四太宗以
其忠多從之遷禮部侍郎真宗即位加戶部命條具
中外錢穀以聞恕久不進屢趣之恕曰陛下富於春
秋若知府庫充實恐生侈心臣是以不敢進真宗嘉
之咸平二年帝北巡克行在轉運使俄以母老求解
拜吏部侍郎知通進銀臺封駁司審官院上言封駁
之任實給事中之職隸於左曹雖別建官局不可失

其故號請以門下封駁事隸銀臺司從之五年知貢
舉恕自以洪人避嫌凡江南貢士悉被黜退又援旨舉
非其人之條故所取甚少而所取以王曾為首及廷
試糊名考校曾復得甲科時議稱之恕每自歎曰吾
得曾名世才也不愧於知人矣恕事母孝母亡哀慕
過甚不食葷茹遂至羸瘠起復視事遷尚書左丞權
知開封府恕已病猶勉強親職數月增劇表求館殿
之職獲奉以濟其貧真宗曰卿求一人可代者聽卿
去是時寇準罷樞密使恕即薦以自代遂以準為三
司使恕為集賢學士判院事準即檢尋恕前後改革

興立之事類以為冊及以所出榜別用新板躬至恕
第請判押恕亦不讓一一押之自是計使無不循其
舊貫至李諮為三司使始改茶法恕之規模漸革矣
帝重恕詔大醫診療百日有司請停奉不許未幾卒
年五十九恕將卒口占遺奏及約束後事送終之具
無不周悉真宗悼惜廢朝贈吏部尚書錄其子執中
為太常寺太祝執古為奉禮郎恕頗涉史傳多識典
故精於吏理深刻少恩人不敢干以私前後掌利柄
十餘年強力幹事胥吏畏服有稱職之譽善談論聽
者忘倦素不喜釋氏嘗請廢譯經院辭甚激切真宗

曰三教之興其來已久前代毀之者多矣但存而不
論可也恕性吝怒子淳私用錢及寢疾上言淳不率
教導多與非類遊常習武藝願出為外州軍校直宗
曰戎校管鎮兵非丞郎家子弟所蒞也以為滁州司
馬恕卒召復舊官後竟以賄敗執中至同中書門下
平章事別有傳執古至虞部員外郎執方執禮並太
子中舍

魏羽者字垂天歙州婺源人少能屬文上書李煜署
弘文館校書郎時建當塗縣為雄遠軍以羽為判官
宋師渡江出其境羽以城降太祖擢為太子中舍仍

舊職金陵平入朝出知興州太平興國初知棣州改
京兆府六年受詔詣瀛州覆軍市租得隱漏數萬計因
上言本州錄事叅軍郭震十年未代河間令崔能前
任即墨未滿歲遷秩有司調選失平疏遠何由聞達
請罪典司以肅欺弊上賜詔褒諭復命遷太常博士
知宋州又徙閬州就改膳部員外郎丁外艱起復蒞
事入判太理寺歷度支戶部二判官召拜本曹郎中
因上疏言三司職官頗衆願省其半可以責成仍條
列利病凡二十事詔下有司詳議皆以為便改鹽鐵
判官時北邊多警朝議耕戰之術以羽為河北東路

營田副使改兩浙轉運使遷兵部郎中淳化初選為
秘書少監踰月遷左諫議大夫俄拜度支使改鹽鐵
使四年併三部為一司以羽判三司先是三司簿領
堆積吏緣為姦雖嘗更立新制未為適中是冬羽上
言依唐制天下郡縣為十道兩京為左右計各署判
官領之制三司使二員以羽為左計使董儼為右計
使中分諸道以隸焉未久以非便罷守本官出知滑
州丁內艱起復加給事中徙潭州遣使諭旨真宗即
位遷工部侍郎連徙杭揚二州召權知開封府車駕
北巡判留司三司再為戶部度支使咸平四年以疾

解職拜禮部侍郎謝日召升便殿從容問諭勉以醫
藥月餘卒年五十八羽涉獵史傳好言事淳化中許
王暴薨或有以官府舊事上聞者太宗怒追捕僚吏
將窮究之羽乘間上言曰漢戾太子竊弄父兵當時
言者以其罪當笞耳今許王之過未甚於是太宗嘉
納之繇是被劾者皆獲輕典嘗建議有唐以來凡制
詔皆經門下省審有非便者許其封駁請遵故事擇
名臣專領其職迄今不廢羽強力有吏幹尤小心謹
事太宗嘗謂左右曰羽有心計亦明吏道但無執守
與物推移耳歷劇職十年始踰四十鬚鬢盡白亦可

憐也羽出入計司凡十八年習知金穀之事然頗傷
煩急不達大體景德二年長子玠卒其妻自陳家貧
無祿上憫之次子校書郎瓘為奉禮郎後為殿中丞
琰為太子中舍孫平仲天禧三年同進士出身羽同
時有劉式者亦久居計司初端拱中三年磨勘之法
首以式主之

式字叔度袁州人也李煜時舉三傳中第歸宋歷遷
大理寺丞贊善大夫監通州豐利監及主三司都磨
勘司仍賜緋式又建議置主轄支收司以謹財賦出
納時以為當遷秘書丞與陳靖使高麗至道中併三

勾院為一命式領之再轉工部員外郎賜金紫遷刑
部式深究簿領之弊江淮間舊有橫賦逋積至多式
奏免之人以為便然多所修奏檢校過峻為下吏所
訟免官卒真宗追錄前効賜其子立本學究出身次
子立之後為國子博士立德立禮並進士及第立德
為殿中丞

劉昌言字禹謨泉州南安人少篤學文詞靡麗本道
節度陳洪進辟功曹叅軍掌牋奏洪進遣子文顯入
貢令昌言偕行太祖親勞之太平興國二年洪進歸
朝改鎮徐州又辟推官五年舉進士入格太宗初惜

科第止授歸德軍掌書記八年復舉得第遷保信武
信二鎮判官宰相趙普鎮南陽重昌言有吏幹錢俶
帥鄧表薦之移泰寧軍節度判官入為左司諫廣南
安撫使淳化初趙普留守西京表為通判委以府政
普疾屬昌言後事普卒昌言感普知已經理其家事
太宗以為忠於所舉拜起居郎賜金紫錢五十萬連
對三日皆至日盱昌言捷給詼詭能揣人主意無不
稱旨太宗謂宰相曰昌言質狀非偉若以貌取失之
子羽矣遷工部郎中踰月守本官充樞密直學士與
錢若水同知審官院二十八日遷右諫議大夫同知

樞密院事昌言驟用不為時望所伏或知其閩語難
曉太宗曰惟朕能曉之又短其委母妻鄉里十餘年
不迎侍別娶旁妻太宗既寵之詔令迎歸京師本州
給錢辨裝縣次續食時又有光祿丞何亮家果州秘
書丞陳靖家泉州不迎其親下詔戒論文武官父母
在劍南峽路漳泉福建嶺南皆令迎侍敢有違者御
史臺糾舉以聞昌言自以登擢非次懼人傾奪會誅
凶人趙贊昌言與贊素善前在河南嘗保任之心不
自安因太宗言及近侍有與贊交者昌言蹶然出位頓
首稱死罪太宗慰勉之然自此惡其為人以給事中

罷出知襄州上言水旱民輸稅愆期舊制六月開倉
臣今先一月許所在縣驛輸納以便民獲盜當部送
闕下臣恐吏柔懦不能制再亡命配隸軍籍此二事
臣從便宜不如詔書慮讒慝因而浸潤願陛下察之太宗
下詔責其不循舊章歛怨於民自今敢背棄詔條譴
責不復恕至道二年徙知荆南府真宗即位就拜工
部侍郎咸平二年卒年五十八贈工部尚書子有方
比部員外郎有政虞部員外郎

張洎滁州全椒人曾祖暉澄城尉祖蘊泗上轉運巡
官父煦滁州司法椽洎少有俊才博通墳典江南舉

進士解褐上元尉李景長子弘冀卒有司謚武宣洎
議以為世子之禮但當問安視膳不宜以武為稱旋
命改謚擢監察御史洎自以論事稱旨遂肆彈擊無
所忌大臣游簡言等嫉之會景遷國豫章留煜居守
即薦洎為煜記室不得從未幾景卒煜嗣擢工部員
外郎試知制誥滿歲為禮部員外郎知制誥遷中書
舍人清輝殿學士叅預機密恩寵第一洎舊字師黯
改字偕仁清輝殿在後苑中煜寵洎不欲離左右授
職內殿中外之務一以諮之每兄弟宴飲作妓樂洎
獨得預為建大第宮城東北隅及賜書萬餘卷煜嘗

至其第召見妻子賜予甚厚洎尤好建議每上言未
即行必稱疾煜手札慰諭之始復視事及王師圍城
踰年城危甚洎勸煜勿降每引符命云玄象無變金
湯之固未易取也北軍旦夕當自引退苟一旦不虞
即臣當先死既而城陷洎携妻子及橐裝自便門入
止宮中給光政使陳喬同升閣欲與俱死喬自經氣
絕洎反下見煜曰臣與喬同掌樞務國亡當俱死又
念主在誰能為主白其事不死將有以報也歸朝太
祖召責之曰汝教煜不降使至今日因出帛書示之
乃圍城日洎所草詔召上江救兵蠟丸書也洎頓首

請罪曰實臣所爲也犬吠非其主此其一爾他尚多
有今得死臣之分也辭色不變上奇之貸其死謂曰
卿大有膽不加卿罪今之事我無替昔日之忠也拜
太子中允歲餘判刑部太宗卽位以其文雅選直舍
人院考試諸州進士未幾使高麗復命改戶部員外
郎太平興國四年出知相州明年夏徙貝州是冬又
知相州部內不治轉運使田錫言其狀代還洎求見
廷辯上以其儒生不責以吏事詔不問令以本官知
譯經院遷兵部員外郎禮戶二部郎中雍熙二年同
知貢舉端拱初契丹寇邊詔羣臣言事洎上奏以練

兵聚穀分屯塞下來則備禦去則勿追爲要略會錢
倣薨太常定謚忠懿泊時判考功爲覆狀經尚書省
集議虞部郎中張似奏駁曰按考功覆狀一句云亢
龍無悔實非臣子而言者况錢俶生長島夷夙爲荒
服未嘗略居尊位終是藩臣故名不可稱龍位不可
爲亢其亢龍無悔四字請改正事下中書以詰洎對
狀曰竊以故秦國王明德茂勳格于天壤處崇高之
富貴絕纖介之譏嫌太常禮院稽其功行定茲嘉謚
考功詳覆之際率遵至公故其議狀云茲所謂受寵
若驚居亢無悔者也謹按易乾之九三云君子乾乾

夕惕若厲無咎王弼注云處下體之極居上體之下
履重剛之險因時而惕不失其幾可以無咎處下卦
之極愈於上九之亢易例云初九爲元士九二爲大
夫九三爲諸侯正義云易之本理以體爲君臣九三
居下體之極是人臣之體也其免亢龍之咎者是人
臣之極可以慎守免禍故云免亢極之禍也漢書梁
商傳贊云地居亢滿而能以謹厚自終楊植許由碑
云錙銖九有亢極一夫杜鴻漸讓元帥表云祿位亢
極過踰涯量盧杞郭子儀碑云居亢無悔其心益降
李翰書霍光傳云有伊周負荷之明無九三亢極之悔

張說祈國公碑云一無目牛之全一無亢龍之悔也
况考功狀內止稱云受寵若驚居亢無悔卽本無亢
龍無悔之語斯蓋張佖擅改公奏罔冒天聰請以元
狀看詳反坐其人以懲姦妄俄下詔曰張洎援引故
實皆有依據張佖學識甚淺敷陳失實尚示矜容免
其黜降可罰一月俸洎未幾遷爲太僕少卿同知京
朝官考課拜右諫議大夫判大理寺又充史館修撰
判集賢院事淳化中上令史館修撰楊徽之等四人
修正入閣舊圖洎同奉詔因討論故事獨草奏以聞
洎又言按舊史中書門下御史臺爲三署謂侍從供

奉之官今起居日侍從官先入殿庭東西立定俟正
班入一時起居其侍從官東西列拜甚失北面朝謁
之儀請準舊儀侍從官先入起居行畢分侍立於丹
墀之下謂之蛾眉班然後宰相率正班入起居雅合於
禮臣又聞古之王者躬勤庶務其臨朝之䟽數視政
事之繁簡唐初五日一朝景雲初始修貞觀故事自
天寶兵興之後四方多故肅宗而下咸隻日臨朝雙
日不坐其隻日或遇陰霽盛夏大寒泥濘亦放百官
起居雙日宰相當奏事卽特開延英召對或夷蠻入
貢勳臣歸朝亦特開紫宸殿引見陛下自臨大寶十

有五年未嘗一日不雞鳴而起聽天下之政雖剛健
不息固天德之常然而游焉息焉亦聖人之謨訓儻
君父焦勞於上臣子緘默於下不能引大體以爭則
忠良之心有所不至矣臣欲望陛下依前代舊規隻
日視朝隻日不坐其隻日遇大寒盛暑陰霪泥濘亦
放百官起居其隻日於崇德崇政兩殿召對宰臣常
叅官以下及非時蠻夷入貢勳臣歸朝亦特開上閣
引見竝請準前代故事處分奏入不報時上令以儒
行篇刻於版印賜近臣及新第舉人洎得之上表稱
謝上覽而嘉之翼日謂宰相曰羣臣上章獻文朕無

不再三省覽如張洎一表援引古今甚不可得可召
至中書宣諭朕意數月擢拜中書舍人充翰林學士
上顧謂近臣曰學士之職清要貴重非他官可比朕
常恨不得爲之故事赴上日設燕教坊以禱戲進久
罷其事至是令盡設之仍詔樞密直學士呂端劉昌
言及知制誥柴成務等預會時以爲榮俄判吏部銓
嘗引對選人上顧之謂近臣曰張洎富有文藝至今
尚苦學江東士人之冠也洎與錢若水同在禁林甚
被寵顧時劉昌言驟擢樞要人望甚輕董儼方掌財
賦欲以計傾之會楊徽之錢熙嘗言洎及若水旦夕

當大用熙以語昌言昌言曰洎必參政柄若水後進
年少豈遽及此時翰林小吏諮事在側昌言慮洎聞
之卽對小吏盡述熙言令告洎洎方修飭邊幅以固
恩寵疑微之遣熙以構飛語中已遂白於上上怒召昌
言質之以微之爲鎮安軍行軍司馬熙罷職通判朗
州會皇子益王元傑改封吳王行揚州潤州大都督
府長史領淮南鎮江兩軍節制洎當草制因上疏議
曰謹按前史皇子封王以郡爲國置傅相及內史中
尉等佐王爲治自漢魏以降所封之王始不之國朝
廷命卿大夫臨郡卽稱內史行郡事東晉永和泰元

之際有邳邪王會稽王臨川王故謝靈運王羲之等
爲會稽臨川內史卽其事也唐有天下以楊益潞幽
荆五郡爲大都督署長史司馬爲上佐卽前代內史
之類也其大都督之號非親王不授其楊益等郡或
有親王遙領朝廷命大臣臨郡者卽皆長史副大使
知節度事也臣請質之前代段文昌出鎮揚州云淮
南節度副大使知節度事兼揚州大都督府長史李
載義鎮幽州云盧龍軍節度副大使知節度事兼幽
州大都督府長史卽其例也今益王以楊潤二郡建
社爲吳國王居大都督之任又已正領節度事豈宜

却加長史之號乃是國王自爲上佐矣若或朝廷且以長史拜受其加銜內又無副大使知節度使之目倘或他日別命守將俾臨本郡即不知以何名目而授除也臣草制之夕便欲上陳慮奏報徃反有妨明日宣降茲事有關國體况吳王未領恩命尚可改正乞付中書門下商議施行宰相以制命已行難於追改洎又上表論列呂蒙正言越王領福州長史今吳王獨爲大都督居越王之上非便上令俟異日除授并改正之至明年上郊祀覃慶遂改焉俄奉詔與李至范果張佖同脩國史又判史館洎博涉經史多知

典故每上有著述或賜近臣詩什洎必上表援引經典傳以將頌其意上因賜詩褒美有翰長老儒臣之句與蘇易簡同在翰林尤不協及易簡叅知政事洎多攻其失旣而易簡罷即以洎爲給事中叅知政事與寇準同列先是準知吏部選事洎掌考功爲吏部官屬準年少新進氣銳思欲老儒附已以自大洎夙夜坐曹視事每冠帶候準出入於省門揖而退不交一談準益重焉因延與語洎捷給善持論多爲準規畫準心伏乃兄事之極口談洎於上上欲進用又知其

在江左日多讒毀良善李煜殺潘佑洎嘗預謀心疑之

翰林待詔尹熙古吳郢皆江東人洎嘗善待之上一夕召熙古輩侍書禁中因問以佑得罪故熙古言煜忿佑諫說太直耳非洎謀也自是洗然遂加擢用蓋準推挽之也既同秉政奉準愈謹政事一決於準無所參預專修時政記甘言善柔而已後因奏事異同準復忌之至道二年五月四方館使曹璨自河西馳騎入奏邊事言繼遷率萬餘眾寇靈州上詔宰相呂端知樞密院事趙瑑等各以所見畫策即日具奏來上呂端相率詣長春殿見上言曰臣等若各述所見則非詢謀僉同之議望許共為一狀陳其利害洎越

次奏曰端等備位輔弼上有所詢問反緘默不言深失訏謨之體端曰洎欲有言不過揣摩陛下意耳必無艱切之理上默然翌日洎上疏引賈捐之棄珠崖事願棄靈武以省關西饋運上嘗有此意既而悔之洎果迎合覽奏不悅既以疏付洎謂之曰卿所陳朕不曉一句洎惶恐而退上召同知樞密院事向敏中等謂曰張洎上言果為呂端所料朕已還其疏矣洎既議事不稱旨恐懼欲自固權位上已嫉準專恣恩寵衰替洎慮一旦同罷免因奏事大言寇準退後多誹謗準但色變不敢自辯上由是大怒準旬日罷未

幾洎病在告滿百日力疾請對方拜踞於上前左右掖起之明日上章求解職優詔不允後月餘改刑部侍郎罷知政事奉詔嗚咽疾遂亟十餘日卒年六十四贈刑部尚書以其二子皆為京官洎風儀灑落文采清麗博覽道釋書兼通禪寂虛無之理終日清談疊疊可聽尤險詖好攻人之短李煜既歸朝貧甚洎猶丐索之煜以白金瓶面噐與洎洎尚未滿意時潘慎修掌煜記室洎疑慎修教煜素與慎修善自是亦稍踈之煜子仲寓雅好蒲博飲宴洎因切諫之仲寓謝過後數月人有言仲寓蒲博如故洎遂與之絕及仲寓死

郢州葬京師洎亦不赴吊與張佖議事不協遂為讐隙始以從父禮事佖既而不拜尤善事內官在翰林日引唐故事奏內供奉官藍敏政為學士使內侍裴俞副之上覽奏謂曰此唐室弊政朕安可踵此覆轍知言過也洎慙而退性鄙吝雖親戚無所需及江表故舊亦罕登其門素與徐鉉厚善後因議事相忤遂絕交然手寫鉉文章訪求其筆札藏篋笥甚於珍玩洎有文集五十卷行于世子安期至國子博士方回後為虞部員外郎方回子懷玉王欽若壻賜進士及第大理寺丞祕書校理

李惟清字直臣下邑人父仲行為章立簿因徙家焉
惟清開寶中以三史解褐涪陵尉蜀民尚淫祀病不
療治聽於巫覡惟清擒大巫笞之民以為及禍他日
又加善焉民知不神然後教以醫藥稍變風俗時遣
宦官督輸造船木縱恣不法惟清奏殺之由是知名
秩滿遷大理寺丞太平興國三年遷為京湖北路轉
運判官五年改左贊善大夫充轉運副使非正使就
改監察御史兼總南路嘗入奏事太宗問曰荆湖累
年豐稔又無徭役民間蘇否惟清曰臣見官賣鹽斤
為錢六十四民以三數斗稻價方可買一斤廼詔斤

減十錢徙京西轉運使入為度支判官改主客員外
郎雍熙三年大舉取幽州惟清以為其食未豐不可
輕動朝廷業已興師奏入不報判度支許仲宣建議
通鹽法以賣鹽歲課賦於鄉村與戶稅均納惟清奉
詔往荆湖諸路詳定奏言以鹽配民非便遂罷使還
上又問民間苦樂不均事惟清言前在荆湖民市清
酒務官釀轉鬻者斗給耗二升今三司給一升民多
他圖而歲課甚減詔復其舊未幾出為京東轉運使
會募丁壯為義軍惟清曰若是天下不耕矣三上疏
諫繇是獨選河北而餘路悉罷擢屯田郎中度支副

使端拱初遷右諫議大夫歷戶部使改度支使會遣使河朔治方田大發兵惟清以盛春妨農懇求罷廢太宗曰兵夫已發矣止令完治邊城而已淳化三年遷給事中充鹽鐵使遂以帳式奏御太宗曰費用若此民力久何以堪如可減省即便裁度惟清曰此開寶軍興之際其數倍多蓋以將帥未得其人邊事未寧屯兵至廣也臣聞漢有衛青霍去病唐有郭子儀李晟西北望而畏之如此則邊事息而支用減矣望慎擢將帥以有威名者俾安邊塞庶節費用上言彼一時此一時也今之西北變詐與古不同選用將帥亦須

深體今之幾宜韓彭雖古之名將以彼時之見制今之敵亦恐不能成功今縱得人未可使知古委之此乃機事卿所未知也淮南權貨務貢岳茶斤爲錢百五十主吏言陳惡者二十六萬六千餘斤惟清擅減斤五十錢不以聞滌泗濠楚州漣水軍亦以岳茶陳惡減價市之計虧錢萬四千餘貫爲勾院使盧守仁所發左授衛尉少卿黜判官李琚爲本曹員外郎賜守仁錢十五萬俄出知廣州至道初就拜右諫議大夫太宗聞其廉平詔獎之二年徙廣南廣西路都轉運使尋召拜給事中踰月同知樞密院事惟清儻

自任有鉤距臨事峻刻所至稱強幹然以俗吏進無人望纔數月真宗卽位加刑部侍郎復除御史中丞既去樞要怫鬱尤甚肆情彈擊咸平元年卒年五十六贈戶部尚書子永錫蔭至光祿寺丞頗涉學屬辭尚氣少檢喜交結馮拯王濟皇甫選多與之游日聚舉子於家談議時政真宗將幸河朔永錫猶服父喪上章大言列詆近臣自謂有致太平滅敵之術選爲戶部判官因對袖表以獻又自薦楊真宗駐蹕大名召赴行在試策不中貶瀧水縣主簿選爲南劍州團練副使俄復光祿寺丞六年又坐交游非類監和州商稅後至右贊善大夫次子永德至殿中丞

論曰張宏爲樞副當用兵之際循默備位趙昌言爲御史中丞屢上書言兵乃兩易之中丞可使循默者居之乎宋失政矣昌言識李沆器王旦陳恕取士得王曾舉代得寇準皆可謂知人之明然趙好獎拔而頗樹黨與終以取敗陳與貢舉務黜南士以避嫌疑皆非君子所爲也昌言尚氣敢言恕爲宋人能吏之首庶足稱矣劉昌言感趙普之遇身後經理其家然委親鄉里十年而不迎侍厚薄失措又何取乎張洎初勸李煜勿降旣而不能死之犬吠非主之對徒以

辯舌僥倖得免厥後揣摩百端讒毀正直利口之士
鮮不爲反覆小人也李惟清居臺端恨失政柄恣情
贅擊舊史稱爲俗吏又奚責焉

心第二十六

列傳卷第二十七

宋史二百六十八

開府儀同三司在國錄軍國重事前書右丞相監修國史領經筵事都總裁展慶奉

勅修

柴禹錫

張遜

楊守一

趙鎔

周瑩

王繼英

王顯

柴禹錫字玄圭大名人少時有客見之曰子質不凡
若輔以經術必致將相禹錫由是留心問學時太宗
居晉邸以善應對獲給事焉太平興國初授供奉官
三年改翰林副使遷如京使仍掌翰林司每夜直上

以藩府舊僚多召訪外事遷宣徽北院使賜第寶積坊告秦王廷美陰謀擢樞密副使踰年轉南院使服勞既久益加勤敏雍熙中議廣宮城禹錫有別業在表識中請以易官邸上因是薄之又與宰相宋琪厚善會廣州徐休復密奏轉運王延範不軌狀且言倚附大臣無敢動搖者上因訪琪及禹錫曰延範何如人延範與琪妻爲踈屬甚言其忠勤禹錫亦傍贊之上意其交通滋不悅禹錫又爲琪請盧多遜故第上益惡其朋比坐琪以詼諧罷相不欲顯言之也下詔切責禹錫以驍衛大將軍出知滄州在任勤於政治部

民請濱州列狀以聞改涪州觀察使徙澶鎮二州駐泊部署俄知潞州州民乞留三載詔獎之徙知永興軍府再召爲宣徽北院使知樞密院事至道初制受鎮寧軍節度知涇州入謝日上謂曰由宣徽罷者不過防禦使爾今委卿旌節兼之重鎮可謂優異矣禹錫流涕哽咽而已咸平中移知貝州是歲契丹兵奄至城下禹錫內嚴備禦寇尋引去明年徙陝州景德初子宗慶選尚召禹錫歸闕令公主就第謁見行舅姑禮固辭不許頃之還鎮未幾卒年六十二贈太尉子宗亮太子中允宗慶永清軍節度

張遜博州高唐人數歲喪父養於叔父職方員外郎
幹後隨母歸魏仁浦家駙馬都尉咸信其異父弟也
太宗在晉邸召隸帳下太平興國初補左班殿直從
征太原還遷文思副使再遷香藥庫使嶺南平後交
趾歲入貢通關市並海商人遂浮舶販易外國物闡
溲三佛齊渤泥占城諸國亦歲至朝貢由是犀象香
藥珍異充溢府庫遜請於京置權易署稍增其價聽
商入金帛市之恣其販鬻歲可獲錢五十萬緡以濟
經費太宗允之一歲中果得三十萬緡自是歲有增
羨至五十萬雍熙二年錄其勞遷領嬀州刺史三年

與安忠並命為東上閣門使數月嘗許仲宣罷判度
支即以遜為度支使端拱初遷鹽鐵使二年授宣徽
北院使簽署樞密院事未幾兼樞密副使知院事與
同列寇準不協每奏事頗相矛盾一日遜等晚歸私
第準與溫仲舒並轡有狂民迎馬首拜呼萬歲街使
王賓舊與遜同事晉邸遜又嘗舉賓雅相厚善因奏
民迎準拜呼萬歲準自辯實與仲舒同行蓋遜令賓
獨奏斥臣辭意俱厲因互發其私太宗惡之下詔切
責遜左降右領軍衛將軍準亦罷職會判右金吾街
仗蔡玉冒奏富人子為州大校黜官命遜代掌其事

西蜀李順為亂詔發兵水陸進討以荆渚居其要害
命遜為右驍衛大將軍知江陵府賜錢二百萬白金
三千兩遜既至會峽路諸漕卒數千人聚江陵有告
其謀變以應蜀寇府中議欲盡誅之遜止捕首惡楊
承進等二十一人斬於市餘黨親加慰撫飛奏以聞
太宗嘉之詔以其卒分配州郡數月遜卒年五十六
時至道元年也贈桂州觀察使歸葬京師遜小心謹
慎徒以攀附至貴顯其訐謀獻替無聞焉子敏中初
補供奉官遜在宣徽表言嘗業文願改秩即換大理
寺丞累在比部郎中次子虛中娶宗室申國公女至

供奉官閣門祗候敏中子先進士及第

楊守一字象先其先河南洛陽人唐末避亂徙家宋
鄭間守一稍通周易及左氏春秋事太宗於晉邸太
宗即位補右班殿直太平興國中出護登州兵召還
監儀鸞司累遷西頭供奉官其下多貴族子弟頗豪
縱徼幸始置三班院令守一專其事考覈授任漸有
條制歲餘改翰林學士守一初名守素至是詔改之
七年與趙瑨柴禹錫相里勳等告秦王廷美陰謀事
擢東上閣門使兼樞密都承旨八年改判四方館事
雍熙中詔護遷雲朔歸附安慶兵屯于潞州二年轉

內客省使仍兼都承旨端拱元年授宣徽北院使簽
署樞密院事是秋卒年六十四贈太尉中使護葬守
一性質直勤謹無他材術徒以肇自王府又事左右
適會時機故歷職通顯飾終之禮率加常數焉子安
期歷國子博士坐事貶卒安期子夢得進士及第
趙鎔字化鈞滄州樂陵人以刀筆事太宗於藩邸即
位補東頭供奉官因使吳越賜國信及錢俶納土遣
檢校帑廩轉內酒坊副使以告秦王廷美陰事遷六
宅使領羅州刺史掌翰林司擢東上閣門使郭贄參
知政事鎔以同府之舊嘗有所請託贄不從鎔撫堂

吏過失以聞贄見上白鎔私謁即召鎔廷辯詞屈出
爲梓遂州都巡檢使改左驍衛大將軍領郡如故代
還知滄州兼兵馬部署鎔在郡完城塹嚴戰具寇嘗
數百騎至境上聞有備引去遷左神武大將軍會崔
翰知州改鎔爲本州鈐轄又知廬州因對自陳願留
不許踰年召爲樞密都承旨同掌三班俄拜宣徽北
院使同知樞密院事與柴禹錫並掌機務嘗遣吏卒
變服散之京城察事卒乘醉與賣書人韓玉鬪毆不
勝因誣玉言涉指斥禹錫等遽以聞玉坐抵法太宗
尋知其寃自後廉事不復聽禹錫出鎮鎔加知院事

真宗即位改南院使檢校太傅以心疾求解是秋授
壽州觀察使咸平元年三月卒年五十五贈忠正軍
節度錄其三子官鎔少涉獵文史美書翰委質晉邸
以勤謹被眷本名容太宗改為鎔曰陶鎔所以成器
也鎔性好佛多蓄古書畫三子忠輔西京左藏庫副
使忠愿虞部員外郎忠厚內殿崇班

周瑩瀛州景城人右領軍衛上將軍景之子也景家
富財好交結歷事唐漢周習水利嘗浚汴口導鄭州
郭西水入中牟渠脩滑州河堤累遷至是官太宗潛
邸時瑩得給事左右即位補殿直領武騎卒巡警泉

福州卒纔數百捕劇賊千餘遷供奉官天雄軍節度
孫永祐轉運使楊緘稱薦之又使綏銀州按邊事還
奏稱旨擢鞍轡庫副使雍熙二年為杭睦五州都巡
檢使兼杭州都監會妖僧紹倫為變瑩擒獲之逮捕
就戮者三百餘人人以為酷濫代還改崇儀使滄州
都監召拜西上閣門使領鎮定高陽關都監加判四
方館事與郝守濬護塞宋州決河俄改三路排陣鈐
轄歷知天雄軍真定二府就遷引進使至道二年代
還會李繼隆討西夏詔瑩請軍前授以機事還拜客
省使簽書樞密院諸房公事俄兼提點宣徽諸房鼓

司登聞院與劉承珪並任真宗嗣位承珪分使河北
告諭加領富州刺史上聞其母老病閔之特封武功
郡太夫人秋拜宣徽北院使先是宣徽著位在樞密副
使上瑩表請居下從之咸平二年太閔命為隨駕鄧署
從征河朔又為駕前馬步都部署三年遷南院使知樞
密院事會蜀平部送脅從者數十百人至闕下西川轉
運使馬亮因入奏請赦其罪遣還瑩以為當盡誅之
令瑩亮廷議上是亮議悉原其罪五年高陽關都部
署闕蕃侯無足領之者宰相請輟宣徽使以居其任
時王繼英任北院上以瑩練達軍事乃拜永清軍節

度兼領其任為三路排陣使瑩隸人有錢仁度者頗
有軍功與虎翼小校劉斌相競為殿直閻瀝所發以
瑩故詔勿問止徙斌隸他軍契丹入寇詔步兵赴寧
邊軍為援瑩至則寇兵已去即日還屯所上聞曰瑩
何不持重少留示以不測輕於舉措非將帥體也景
德初丁內艱起復代王顯為天雄軍都部署兼知軍
府事嘗召池州騎士千五百人赴大名道與寇直力
戰有死傷者瑩猶謂其玩寇將悉誅之詔賜金帛諭
瑩勿治其罪車駕北巡為駕前東西貝冀路都部署
明年改知陝州俄徙永興軍府又移邠州兼理慶路

都部署時夏州內屬詔省戍兵還營以減饋餉之費
仍手詔諭瑩瑩遽奏乞留以張邊威上謂瑩庸懦不
智以曹瑋代之徙知澶州大中祥符初改太平軍節
度明年爲真定都部署兼知定州轉運使奏其曠弛
徙知澶州境內屢有寇盜宰相以瑩任居將帥不能
以威望鎮靖請徙他郡上曰處之閑僻適使其自偷
爾遂下詔督責令其擒捕時發卒脩河防而軍中所
給糗糧多腐敗不可食又役使不均瑩不加恤以故
亡命者衆七年入朝復遣還鎮又以澶淵當契丹之
衝藉其廩給之厚復命知澶州九年被疾求還京師
卒年六十六贈侍中初謚忠穆後改元惠錄其二子
供奉官普顯爲內殿崇班二孫永昌永吉爲殿直瑩
居樞近無他謀略及蒞軍旅歷蕃鎮功業無大過人
者故事大禮覃慶外蕃無賜物例東封歲瑩鎮澶淵
車駕所經故特有襲衣金帶器帛之賜祀汾陰瑩知
定州乃預上言禮成所賜至於治所支給人咸笑之
普後爲崇儀副使顯至內殿承制

王繼英開封祥符人少從趙普給筆札普自罷河陽
爲少保從者皆去繼英趨事逾謹普再入相繼英隸
名中書五房院時真宗在藩邸選爲導吏兼內知客

事太宗召見謂曰汝昔事趙普朕所備知今奉親賢尤宜盡節及建儲授左清道率府副率兼左春坊謁者謁者本宦職副率品秩頗崇非趨走左右者所宜爲俾兼領之執政之誤也真宗卽位擢爲引進使咸平初領恩州刺史兼掌閣門使遷左神武大將軍樞密都丞旨改客省使契丹入寇繼英密請車駕北巡上從之卽命繼英馳傳請鎮定高陽關閱視行宮儲頓宣諭將士俄充澶州鈴轄會大將傅潛逗撓得罪令繼英卽軍中召還屬吏尋掌三班拜宣徽北院使與周瑩同知樞密院事瑩出鎮繼英遂冠樞密小心

慎靖以勤敏稱上倚賴之景德初授樞密使舊制樞密院使祖母及母止封郡太夫人有詔特加國封嘗因進補軍校白上曰疎外之人急於攀附者謂臣蒙赦不爲薦引上曰此輩雖有夤緣亦須因事立功方許擢用不可過求僥倖卿勿復言也從幸澶州契丹請和諏訪經略繼英預焉明年郊祀加特進檢校太傅三年卒年六十上臨哭之賜白金五十兩贈太尉侍中謚恭懿且爲葬其祖父贈其妻賈長樂郡太夫人錄其子壻門下親吏數十人初繼英幼孤寄育外氏旣貴外王父諸舅有族殯者時方奏遣其子營葬

會卒特詔有司給辦焉子遵式遵誨遵度遵範皆至
顯宦

王顯字德明開封人初爲殿前司小吏太宗居藩嘗
給事左右性謹介不好狎未嘗踐市肆卽位補殿直
稍遷供奉官太平興國三年授軍器庫副使遷尚
食使逾年與郭昭敏並爲東上閣門使八年春拜宣
徽南院使兼樞密副使是夏制授樞密使上謂之曰
卿世家本儒少遭亂失學今典朕機務無暇博覽羣
書能熟軍戒三篇亦可免於面墻矣因取是書及道
德坊宅一區賜之其後居位旣久機務益繁副使趙

昌言寇準鋒氣皆銳慢顯顯或失誤護短終不肯改
上每面戒之淳化三年八月詔加切責黜授隨州刺
史充崇信軍節度觀察等使遣之任俄知永興軍徙
延州時夏臺益部寇擾顯上疏曰間歲以來戎事未
息李繼遷負恩於靈夏王小波干紀於巴邛河右坤
維並興師旅而繼遷翻然向化遣子入覲願脩職貢
陛下曲加容納許其內附示以德信伸以恩錫所以
綏懷之者至矣然而狼子野心未可深信所宜謹屯
戍固城壘積芻糧然後遴選才勇付以邊任縱有緩
急則備禦有素彼又奚能爲患哉至若蜀寇未平神

人共憤謂宜申飭將帥速期蕩平既免老師以費財
 且防事久則生變又况邛蜀物產殷富其間士卒驕
 怠遲留顧戀寔兼有之莫若勿憚往來潛為更代既
 可均其勞逸抑可免於遷延至於河北關防所當加
 謹者誠以國家方事西南密謀興舉若分中朝之勢
 力則長外寇之姦謀矣時制沿邊糧斛不許過河西
 河西青鹽不得過界販鬻犯者不以多少處斬顯請
 犯多者依法自餘別為科斷以差其罪章上未報移
 知秦州初溫仲舒知州日開拓山林諷藩部獻其地
 後朝廷雖嘗給還而林伐如故轉運使盧知翰請量

給藩部茶絲以酬所獻詔遣張從式與顯同往規度
 顯言乃者朝命以趙保吉脩貢邊城務使安靜若今
 動衆開斥疆境非便議遂罷咸平初入朝改橫海軍
 節度出知鎮州二年曹彬卒復拜樞密使郊祀加檢校
 太師真宗幸大明內樞惟顯與副使宋湜從言者多
 謂顯專司兵要謀略非長會湜卒乃以叅知政事向
 敏中權同知樞密院事三年春改授山南東道節度
 同中書門下平章事定州路行營都部署河北都轉
 運使兼知定州秋吏民詣駐泊都部署孔守正言顯
 治狀願借留守正以聞明年秋加鎮定高陽關三路

都部署許便宜從事十月契丹入寇前軍過威虜軍
北時方積雨契丹以皮爲弦濕緩不堪用顯因大破
之梟獲名王貴將十五人及羽林印二鈕斬首二萬
級顯上言先奉詔令於近邊布陣及應援北平控扼
之路無何敵騎已越亭障顯之前陣雖有擬克終違
詔命上章請罪上降手札以慰其憂悸明年求致仕
不許改河陽三城節度將之鎮時議親征契丹顯言
盛寒在序敵未犯塞鑿輿輕舉直抵窮邊寇若不逢
師乃先老况今繼遷未滅西鄙不寧儻北邊部落與
之結援則中國之患未可量也議者乃於此時請復

幽薊非計之得也凡建議大事上下協力舉必成功
今公卿士大夫以至庶人尚有異同未可謂爲萬全
之舉若能選擇將帥訓練士卒堅城壘而繕甲兵亦
足以待敵矣必欲復燕薊舊地則必修文德養勇銳
伺時之利以奉行天罰而後可景德初徙知天雄軍
府又言祖宗以來多命近臣統領軍旅今後宣徽使
宜於文武羣臣中擇曉達邊事者爲之蓋位高則威
名著識遠則勲勞立故也武臣以罪黜者宜加容貸
不以一眚遂廢苟用之有恩必得其死力故曰使功
不如使過也至若臨敵命將則貴專任出師應敵則

約束將校使相應援全是數者則軍威倍壯人心增
勇矣既而上表請赴行在從之是年秋遣還鎮契丹
入寇上議親征顯復陳三策謂大將軍方在鎮定契
丹必不南侵車駕止駐澶淵詔鎮定出兵會河南軍
合擊之可也若契丹母子虛張聲勢以抗我師潛遣
銳兵南攻駕前諸軍則令鎮定之師直衝戎帳攻其
營砦則沿河遊兵不戰而自屈矣否則遣騎兵千步
兵三千於濮州渡河橫掠澶州繼以大軍追北掩擊
亦可出其不意也已而契丹請盟趙德明遣使修貢
稱藩朝廷加賞錫且許通青鹽以濟邊民從顯之請

也三年冬被病詔中使偕尚醫療視明年正月許還
京師時車駕上陵顯謂賓佐曰余年位偕極今天子
道出虎牢不得一拜屬車之塵是遺恨也言訖涕下
至京信宿卒年七十六車駕至鄭州聞之遣宮苑使鄧
永遷馳還護喪贈中書令謚忠肅錄其二子顯自三
班不數年正樞任獎擢之速時無礙之者顯吏軍司
時張永德以滑州節制為殿前都點檢及顯自樞密
鎮孟津兼相帥永德由太子太師為相帥同日宣制
永德兼大夫及在顯下時人訝之顯居中執政矯情
以厚胥吏齷齪自固而已在藩鎮頗縱部曲擾下論

者非之子希逸字仲莊以蔭補供奉官好學尤熟唐
史聚書萬餘卷換秩授朝奉大夫太子中允咸平初
改殿中丞直史館預脩冊府元龜加祠部員外郎卒
希範至如京副使

論曰自柴禹錫而下率因給事藩邸以攀附致通顯
者凡七人若守一之質直趙鎔之勤謹服勞雖久而
益脩乃職則其被眷遇也宜矣張遜優於理財而未
免於媚嫉周瑩練習軍旅而頗傷於酷濫禹錫素稱
勤敏而不能不涉於朋比王顯雖謹介自將而昧於
學識故莫逃於齷齪之譏若以勤謹被信任者德冠

樞宥而善終如始者其惟繼業乎易曰君子之德也
此之謂也

列傳卷之三十一

字四...

列傳卷第二十八

宋史二百六十九

開府儀同三司柱國錄軍國重事前中書右丞相監修國史領經筵事都總裁臣脫脫等奉

勅修

陶穀

扈蒙

王著

王祐

子旭孫質

楊昭儉

魚崇諒

張澹

高錫

從子冕

陶穀字秀實邠州新平人本姓唐避晉祖諱改焉歷北齊隋唐為名族祖彥謙歷慈絳澧三州刺史有詩名自號鹿門先生父渙領夷州刺史唐季之亂為邠帥楊崇本所害時穀尚幼隨母柳氏育崇本家十餘

嘉靖丁巳年

卷第二十八

一

監生徐天佑刊

歲能屬文起家校書郎單州軍事判官嘗以書干宰相李崧崧甚重其文時和凝亦為相同奏為著作佐郎集賢校理改監察御史分司西京遷虞部員外郎知制誥會晉祖廢翰林學士兼掌內外制詞目繁委穀言多委愜為當時最少帝初賜緋袍靴笏黑銀帶天福九年加倉部郎中初崧從契丹以北高祖入京師以崧第賜蘇逢吉而崧別有田宅在西京逢吉皆取之崧自北還因以宅券獻逢吉逢吉不悅而崧子弟數出怨言其後逢吉乃誘告崧與弟嶼義等下獄崧懼移病不出崧族子昉為秘書郎嘗往候崧崧語

昉曰邇來朝廷於我有何議昉曰無他聞唯陶給事往往於稠人中厚誣叔父崧歎曰穀自單州判官吾取為集賢校理不數年擢掌誥命吾何負於陶氏子哉及崧遇禍昉嘗因公事詣穀穀問昉識李侍中否昉歛衽應曰遠從叔爾穀曰李氏之禍穀出力焉昉聞之汗出穀性急率嘗與兗帥安審信集會杯酒相失為審信所奏時方姑息武臣穀坐責授太常少卿嘗上言頃泄西臺每見臺司詳斷刑獄少有即時決者至於問閻夫婦小有爭訟淹滯即時坊市死亡喪葬必俟臺司判狀奴婢病亡亦須檢驗吏因緣為姦

而邀求不已經旬不獲埋瘞望申條約以革其弊從之俄拜中書舍人嘗請教習樂工停二舞卽及禁民伐桑棗為薪並從其請開運三年賜金紫契丹主北歸脅穀今從行穀逃匿僧舍中衣布褐陽為行者狀軍士意其詐持刃陵脅者日數四穀頗工曆數謂同輩曰西南五星連珠漢地當有王者出契丹主必不得歸國及耶律德光死有孛光芒指北穀曰自此契丹自相魚肉未不亂華矣遂歸漢為給事中乾祐中令常參官轉對穀上言曰五日上章曾非舊制百官叙對且異昌言徒免天聽無益時政欲乞停轉對在

朝群臣有所聞見卽許不時詣闕聞奏從之仕周爲右散騎常侍世宗卽位遷戶部侍郎從征太原時魚崇諒迎母後至穀乘間言曰崇諒宿留不來有顧望意世宗頗疑之崇諒又表陳母病詔許歸陝州就養以穀爲翰林學士世宗謂宰相曰朕觀歷代君臣治平之道誠爲不易又念唐晉失德之後亂臣黠將僭竊者多今中原甫定吳蜀幽并尚未平附聲教未能遠被宜令近臣各爲論策宣導經濟之略乃命承旨徐台符以下二十餘人各撰爲君難爲臣不易論平邊策以進其策率以脩文德來遠人爲意惟穀與竇

儀楊昭儉王朴以封疆密邇江淮當用師取之世宗自克高平常訓兵講武思混一天下及覽其策忻然聽納由是平南之意益堅矣顯德三年遷兵部侍郎加承旨世宗留心稼穡命工刻木爲耕夫織婦蠶女之狀置於禁中思廣勸課之道穀爲贄辭以進顯德六年加吏部侍郎宋初轉禮部尚書依前翰林承旨穀在翰林與竇儀不協儀有公望慮其軋已嘗附宰相趙普與趙逢高錫輩共排儀儀終不至相位乾德二年判吏部銓兼知貢舉再爲南郊禮儀使法物制度多穀所定時范質爲大禮使以函簿清游隊有甲

騎具裝莫知其制度以問於穀穀曰梁貞明丁丑歲河南尹張全義獻三甲三百副馬具裝二百副其人甲以布爲裏黃絕表之青綠畫爲甲文紅錦綠青絕爲下裙絳韋爲絡金銅玦長短至膝前膺爲人面二目背連膺纏以紅錦騰蛇馬具裝蓋尋常馬甲但加珂拂於前膺及後鞞爾莊宗入洛悉焚毀質命有司如穀說造以給用又乘輿大輦久亾其制穀創意造之後承用焉明德門成詔穀爲之記乾德中命庫部員外郎王貽孫周易博士奚嶼同考試品官子弟穀屬其子鄆於嶼鄆書不通以合格聞補殿中省進馬

俄爲人所發下御史府案問嶼責授乾州司戶貽孫
責授左贊善大夫奪穀奉兩月穀後累加邢部戶部
二尚書開寶三年卒年六十八贈右僕射穀強記嗜
學博通經史諸子佛老咸所總覽多蓄法書名畫善
隸書爲人雋辨宏博然奔競務進見後學有文采者
必極言以譽之聞達官有聞望者則巧詆以排之其
多忌好名類此初太祖將受禪未有禪文穀在旁出
諸懷中而進之曰已成矣太祖甚薄之嘗自曰吾頭
骨法相非常當戴貂蟬冠爾盖有意大用也人多笑
之子邴至起居舍人天禧四年錄穀孫寔試秘書省

校書郎

扈蒙字日用幽州安次人魯祖洋涿州別駕祖智周
盧龍軍節度推官父魯內園使蒙少能文晉天福中
舉進士入漢爲鄆縣主簿趙思綰叛遣郭從義討之
郡縣吏供給皆戎服趨事蒙冠服褒博舉止舒緩從
義頗訝之轉運使李穀謂曰蒙文學名流不習吏事
遂不之問周廣順中從歸德軍節度趙暉爲掌書記
召爲右拾遺直史館知制誥蒙從弟載時爲翰林學
士兄弟並掌內外制時號二扈宋初由中書舍人遷
翰林學士坐請託於同年仇華黜爲太子左贊善大

夫稍遷左補闕掌大名市征六年復知制誥充史館
脩撰開寶中受詔與李穆等同脩五代史詳定古今
本草五年連知貢舉七年蒙上書言昔唐文宗每召
大臣論事必命起居郎起居舍人執筆立於殿側以
紀時政故文宗實錄稍為詳備至後唐明宗亦命端
明殿學士及樞密直學士輪脩日曆送史官近來此
事都廢每季雖有內殿日曆樞密院錄送史館然所
記者不過臣下對見辭謝而已帝王言動莫得而書
緣宰相以漏泄為虞昧於宣播史官疏遠何得與聞
望自今凡有裁制之官優恤之言發自宸衷可書簡

策者並委宰臣及參知政事每月輪知抄錄以備史
官撰集從之即以參知政事盧多遜典其事九年正
月受朝乾元殿降王在列聲明大備蒙上聖功頌以
述太祖受禪平一天下之功其詞誇麗有詔褒之為
盧多遜所惡出知江陵府太宗即位召拜中書舍人
旋復翰林學士與李昉同脩太祖實錄太平興國四
年從征太原還轉戶部侍郎加承旨雍熙二年被疾
以工部尚書致仕未幾卒年七十二贈右僕射自張
昭竇儀卒典章儀注多蒙所刊定初太祖受周禪追
尊四廟親郊以宣祖配天及太宗即位禮官以為舜

郊譽商郊冥周郊后稷王業所因也若漢高之太公
光武之南頓君雖有帝父之尊而無預配天之祭故
自太平興國三年六年再郊並以太祖配於禮為允
太宗將東封蒙定議曰嚴父莫大於配天請以宣祖
配天自雍熙元年罷封禪為郊祀遂行其禮識者非
之蒙性沉厚不言人是非好釋典不喜殺縉紳稱善
人有笑疾雖上前不自禁多著述有鰲山集二十卷
行於世載字仲熙有傳見五代史

王著字成象單州單父人性豁達無城府幼能屬文
漢乾祐中舉進士周祖鎮大名世宗侍行聞著名召
置門下因得謁見周廣順中世宗鎮澶州辟觀察支
使隨世宗入朝遷殿中丞卽位拜度支員外郎顯德
三年充翰林學士六年丁家艱起復南唐李景使其
弟從善來貢會恭帝嗣位命著伴送至睢陽加金部
郎中知制誥賜金紫世宗靈駕赴慶陵符后從行公
務悉資於著宋初加中書舍人建隆二年知貢舉時
亳州獻紫芝鄆州獲白兔隴州貢黃鸚鵡著獻頌因
以規諫太祖甚嘉其意下詔褒之四年春宿直禁中
被酒髮倒垂被面夜扣滋德殿門求見帝怒發其醉
宿娼家之過黜爲比部員外郎乾德初改兵部員外

郎二年復知制誥數月加史館修撰判館事三年就
轉戶部郎中六年復爲翰林學士加兵部郎中再知
貢舉開寶二年冬暴卒年四十二著少有俊才世宗
以慎府舊僚眷待尤厚常召見與語命皇子出拜每
呼學士而不名屢欲相之以其嗜酒故遲留久之及
世宗疾大漸太祖與范質入受顧命謂質等曰王著
蕃邸舊人我若不諱當命爲相世宗崩乃止著善與
人交好延譽後進當世士大夫稱之有傳見五代史
王祐字景叔大名莘人祖言仕唐黎陽令父徹舉後
唐進士至左拾遺祐少篤志詞學性倜儻有俊氣晉

天福中以書見桑維翰稱其藻麗由是名聞京師鄴
帥杜重威辟爲觀察支使漢初重威移鎮睢陽反側
不自安祐嘗勸之使無反漢不聽祐坐是貶沁州司
戶參軍因作書貽鄉友以見志辭氣俊邁人多稱之
仕周歷魏縣南樂二令太祖受禪拜監察御史由魏
縣移知光州遷殿中侍御史乾德三年知制誥六年
加集賢院脩撰轉戶部員外郎太祖征太原已濟河
諸州饋集上黨城中車乘塞路上聞之將以稽留罪
轉運使趙普曰六師方至而轉運使以獲罪聞敵必
謂儲峙不充有以窺我矣非威遠之道矣俾能治劇

者往蒞其州足矣即命祐知潞州及至饋餉無乏路亦無壅班師召還會符彥卿鎮大名頗不治太祖以祐代之俾察彥卿動靜謂曰此卿故鄉所謂畫錦者也祐以百口明彥卿無罪且曰五代之君多因猜忌殺無辜故享國不永願陛下以爲戒彥卿由是獲免故世謂祐有陰德繼以用兵嶽表徙知襄州湖湘平移知潭州召還攝判吏部銓時左司員外郎侯陟自揚州還復判銓祐判門下省陟所注擬祐多駁正盧多遜與陟善陟因訴之多遜素惡祐不比已遂出祐爲鎮國軍行軍司馬太平興國初移知河中府入爲

左司員外郎拜中書舍人充吏館脩撰未幾知開封府以病請告太宗謂祐文章清節兼著特拜兵部侍郎月餘卒年六十四初祐掌誥會盧多遜爲學士陰傾趙普多遜累諷祐比已祐不從一日以宇文融排張說事勸釋之多遜滋不悅及普再入多遜果敗與宇文融事頗類識者服其先見祐子三人曰懿曰旦曰旭旦自有傳初祐知貢舉多拔擢寒俊畢士安柴成務皆其所取也後與其子旦同入兩制居中書懿字文德勵志爲學舉進士嘗知表州有政績卒年四十九

旭字仲明嚴於治內恕以接物尤篤友義以蔭補太祝嘗知緱氏縣時官鄰邑者多貪猥民有永寧三鑿緱氏一鎌之謠又知雍丘縣真宗尹京時素聞其能及踐阼三遷至殿中丞自旦居宰府旭以嫌不任職王矩嘗薦旭材堪治劇真宗召旦謂曰前代弟兄同居要地者多矣朝廷任才豈以卿故屈之邪命授京府推官旦固辭改判南曹由判國子監出知潁州荒政脩舉大中祥符間旦旣薨敷歷中外早有政績由兵部郎中出知應天府卒年六十八懿子睦旭子質皆能其官

質字子野少謹厚淳約力學問師事楊億億歎以爲英妙伯父旦見其所爲文嗟賞之以蔭補太常寺奉禮郎後獻文召試賜進士及第被薦爲館閣校勘改集賢校理累遷尚書祠部員外郎丁父憂與諸弟飯脫粟茹蔬終喪通判蘇州州守黃宗旦少質嘗因爭事宗旦曰少年乃與丈人抗邪質曰事有當爭職也卒不爲屈宗旦得盜鑄錢者百餘人下獄治退告質曰吾以術鈎致得之喜見於色質曰以術鈎人寘之死而又喜仁者之政固如是乎宗旦慙沮爲薄其罪還判尚書刑部吏部南曹知蔡州州人歲時祀異元

濟廟質曰安有逆醜而廟食於民者毀之爲更立狄
仁傑李愬像而祠之蔡人至今號雙廟以本曹郎中
召爲開封府推官時兄雍爲三司判官質不欲兄弟
並居省府懇辭得知壽州徙廬州盜殺其徒并質而
遁捕得之質論盜死大理以謂法不當外質曰盜殺
其徒自首者原之所以疑懷其黨且許之自新此法
意也今殺人取質而捕獲質之豈法意乎疏上不報
降監好州靈仙觀採古今鍊形攝生之術撰寶元總
錄百卷逾年韓琦知審刑院請盜殺其徒非自首者
勿原著爲令於是鄭戩葉清臣皆言質非罪且稱其

材起知秦州遷度支郎中徙荆湖北路轉運使嘗攝
江陵府事或訐民約婚後期民言貧無貲以辦故違
約質問其費幾何出私錢予之吏捕盜人衣者盜叩
頭曰平生不爲過迫饑寒而至於此質命取衣衣之
遣去加史館脩撰同判吏部流內銓擢天章閣待制
出知陝州卒質家世富貴兄弟習爲驕侈而質克已
好善自奉簡素如寒士不喜畜財至不能自給初旦
爲中書舍人家貧與昆弟貸人息錢違期以所乘馬
償之質閱書得故券召子弟示之曰此吾家素風爾
曹當毋忘也范仲淹貶饒州治朋黨方急質獨載酒

往錢或以誚質質曰范公賢者得爲之黨幸矣世以此益賢之

楊昭儉字仲寶京兆長安人曾祖嗣復唐門下侍郎平章事吏部尚書祖授唐刑部尚書父景梁左諫議大夫昭儉少敏俊後唐長興中登進士第解褐成德軍節度推官歷鎮魏掌書記拜左拾遺直史館與中書舍人張昭遠等同脩明宗實錄書成遷殿中侍御史天福初改禮部員外郎晉祖命宰相馮道爲契丹冊禮使以昭儉爲介授職方員外郎旋加虞部郎中俄以本官知制誥不逾月三拜命時人榮之又爲荆

南高從誨生辰國信使賜金紫使回拜中書舍人又爲翰林學士時驕將張彥澤鎮涇原暴殺從事張式朝廷不加罪昭儉與刑部郎中李濤諫議大夫鄭受益抗疏論列請置之法疏奏不報會有詔令朝臣轉對或有封事亦許以不時條奏昭儉復上疏曰天子君臨四海日有萬機懋建諍臣彌縫其闕今則諫臣雖設言路不通藥石之論不達於聖聰而邪佞之徒取容於左右御史臺紀綱之府彈糾之司銜寬者固當昭雪爲蠹者難免放流陛下臨御以來寬仁太甚徒置兩司殆如虛器遂令節使慢侮朝章屠害幕吏

始訴寃於丹闕反執送於本蕃苟安跋扈之心莫恤
寃抑之苦願回睿斷誅彥澤以謝軍吏由是權臣忌
之會請告洛陽不赴晉祖喪為有司所糾停官未幾
起為河南少尹改秘書少監尋復中書舍人時河決
數郡大發丁夫以本部帥董其役既而塞之晉少主
喜詔立碑記其事昭儉表諫曰陛下刻石紀功不若
降哀痛之詔摘翰頌美不若頒罪已之文言甚切至
少主嗟賞之卒罷其事周世宗愛其才復召入翰林
為學士歲餘改御史中丞多振舉甚憲故事未幾以
鞫獄之失與知雜御史趙礪侍御史張紉並出為武
勝軍節度行軍司馬開寶二年入為太子詹事以眼
疾求退六年以工部尚書致仕太宗即位就加禮部
尚書太平興國二年卒年七十六昭儉美風儀善談
名理事晉有直聲然利口喜譏訾執政大臣懼其構
謗多曲徇其意

魚崇諒字仲益其先楚州山陽人後徙於陝崇諒初
名崇遠後避漢祖諱改之幼能屬文弱冠相州刺史
辟為從事會魏帥楊師厚卒建相州為昭德軍分魏
郡州縣之半以隸之魏人不便裨校張彥及帳下囚
節度使賀德倫歸欵莊宗崇諒奔歸陝明宗即位秦

王從榮表為記室從榮誅坐除籍流慶州清泰初移
華州俄以從榮許歸葬放還陝三年起為陝州司馬
仕晉歷殿中侍御史鳳翔李儼表為觀察支使奉方
物入貢宰相薦為屯田員外郎知制誥開運末契丹
入汴契丹相張礪薦為翰林學士契丹主北歸留崇
諒京師漢祖之入盡索崇諒所受契丹詔敕焚於朝
堂復令知制誥俄拜翰林學士就加中書舍人隱帝
即位崇諒以母老求就養除保義軍節度副使領台
州刺史食郡奉會舉師討三叛節度使白文珂在軍
前崇諒知後事凡供軍儲備調發皆促期而辦近鎮

賴之崇諒親屬盡在鳳翔城中踰年城破李穀為轉
運使庇護崇諒家數十口皆無恙崇諒請告自岐迎
居於陝未幾王仁裕罷內職朝議請召崇諒為學士
周祖踐阼書詔繁委皆崇諒為之廣順初加工部侍
郎充職會兗州慕容彥超加封邑彥超已懷反側遣
崇諒充使賜官告仍慰撫之時多進策人命崇諒就
樞密院引試考定升降崇諒以母老忌鄉里求解官
歸養詔給長告賜其母衣服繒帛茶藥緡錢假滿百
日令本州月給錢三萬米麪十五斛俄拜禮部侍郎
復為學士詔令侍母歸闕崇諒再表以母老病乞終

養優詔不允世宗征高平崇諒尚未至陶穀乘間言
曰魚崇諒逗遛不來有顧望意世宗頗疑之崇諒又
表陳母病詔許歸陝州就養訖太祖朝不起太宗即
位詔受金紫光祿大夫尚書兵部侍郎致仕歲餘卒
張澹字成文其先南陽人徙家河南澹幼而好學有
才藻晉開運初登進士第宰相桑維翰器之妻以女
解褐校書郎直昭文館再遷秘書郎充鹽鐵推官歷
左拾遺禮部員外郎並充史館脩撰出爲洛陽令秩
滿授吏部員外復充史館修撰周恭帝初拜右司員
外郎知制誥建隆二年加祠部郎中會秘書郎張去

華上書自薦有文藝願與澹及祠部員外郎知制誥
盧多遜殿中侍御史師頌並試覈定優劣太祖令並
試於講武殿澹所對不應策問責授左司員外郎未
幾通判秦州兼海陵鹽監副使蜀平通判梓州復拜
祠部郎中開寶初就轉倉部郎中四年冬以本官知
制誥六年會李昉責授盧多遜使江南內署闕學士
太祖令澹權直學士院七年長春節攝殿中監祭酒
命賜金紫六月權點檢三司事不逾旬疽發背卒年
五十六太祖聞其無子甚愍之命中使護葬於洛陽
澹美風儀善談論歷官釐務所至皆治初與詞臣校

藝黜居郎署頗快快晚年附會盧多遜方再獲進用
淳化中太宗論及文士曰澹典書命而試以策非其
所長此蓋陶穀高錫黨張去華以沮澹爾若使穀輩
出其不意而遽試之豈有不失律者耶

高錫字天福河中虞鄉人家世業儒幼穎悟能屬文
漢乾祐中舉進士王晏鎮徐州辟掌書記留守西洛
又辟河南府推官坐按獄失實奪官遷置涇州會赦
得歸周顯德初劉崇入寇宰相請選將據之世宗銳
意親征破崇高平誅敗將樊愛能等由是政無大小
悉親決之不復責成有司錫徒步詣招諫匭上書請

擇賢任官分治衆職疏奏不報世宗嘗令翰林學士
及兩省官分撰俳優詞付教坊肄習以奉游宴錫復
上疏諫後爲蔡州防禦推官宋初棄官歸京師詣匭
上疏請禁兵器疏入不報建隆五年又以書于宰相
范質質奏用爲著作佐郎明年春遷監察御史秋拜
左拾遺知制誥加屯田員外郎乾德初賜緋太宗尹
京石熙載在幕中錫弟銑應進士舉于熙載望首薦
銑辭藝淺薄熙載不許錫深銜之數於帝前言熙載
裨贊無狀帝具以語太宗且曰當爲汝擇人代之太
宗曰熙載勤於迺職聞高錫嘗求薦其弟熙載拒之

慮爲錫所構帝大悟雖怒之未有以發會使青州私受節帥郭崇賂遺又嘗致書澧州刺史爲僧求紫衣爲人所告事下御史府核實責貶萊州司馬遇赦改均州別駕移陳州太平興國八年卒兄子冕冕字子莊周顯德中詣闕上書稱指擢爲諫議大夫宰相范質以爲超擢太過詔特受將仕郎守右補闕賜賚加等宋初由膳部都官員外郎累至膳部郎中出知益州雍熙二年卒年五十贈右諫議大夫錄其子垂休爲固始主簿

論曰自唐以來翰林直學士與中書舍人對掌訓辭頌宣功德箴諫闕失不專爲文墨之職也宋興亦采詞藻以備斯選若穀之才雋著之敏達澹之治迹錫之策慮冕之敦質咸有可觀然豫成禪代之詔見薄時君終身不獲大用及夫險詖忌前酣營少檢附勢希榮構讒謀已皆無取焉蒙博洽長厚繼實儀裁定儀制惜乎南郊之議請去太祖以宣祖配天爲識者所非昭儉抗論跋扈志除驕將而多言歷詆自取惡名抑好訐爲直者與崇諒奉親篤至反罹間毀終身歸養而不復起後蒙旌賁之典則爲善者聳動矣祐以百口明符彥卿無他志且言以猜忌殺無辜者享

國不長因以杜太宗之他疑又却盧多遜之傾趙普以致被黜仁者有後宜乎子旦爲宋元臣焉

列傳卷第二十八

列傳卷第二十九 宋史二百七十

開府儀同三司桂國監國重事兼相纂國史領經筵事都總裁昫等奉

勅修

顏衍 劇可久 趙逢 蘇曉

高防 馮瓚 邊珣 王明

許仲宣 楊克讓 段思恭 侯陟

李符 魏丕 董樞

顏衍字祖德兗州曲阜人自言兗國公四十五世孫少苦學治左氏春秋梁龍德中擢第解褐授北海主簿以治行聞再調臨濟令臨濟多淫祠有針姑廟者

里人奉之尤篤衍至卽焚其廟後唐天成中爲鄒平令符習初鎮天平習武臣之廉慎者以書告屬邑母聚歛爲獻賀衍未領書以故規行之尋爲吏所訟習遽召衍笞之幕客軍吏咸以爲辱及正人習甚悔焉卽表爲觀察推官且塞前事長興初召拜太常博士習力奏留之習致仕衍東歸養親未幾房知溫鎮青州復辟置幕下知溫險愎厚歛多不法衍每極言之不避其患晉祖入洛知溫恃兵力偃蹇衍勸其入貢知溫以善終衍之力也知溫諸子不慧衍勸令以家財十萬餘上進晉祖嘉之歸功於衍知溫子彥儒授

沂州刺史衍拜殿中侍御史俄遷都官員外郎充東都留守判官改河陽三城節度副使檢校左庶子知州事居半歲得家問父在青州有風痺疾衍不奏棄官去侍疾不復有仕宦意歲餘父疾不能起衍親自掬矢未嘗少倦晉祖聞之召爲工部郎中樞密直學士連使促召至闕辭曰臣無他才術未知何人誤有聞達望放臣還遂其私養晉祖曰朕自知卿非他人薦也俄廢樞密院以本官奉朝請踰年上表請還侍養授青州行營司馬丁父憂哀毀甚俄召爲駕部郎中鹽鐵判官以母老懇辭有詔止守本官未幾復出

爲天平軍節度副使開運末授左諫議大夫權判河
南府召拜御史中丞喪亂之後朝綱不振衍執憲頗
有風采嘗上言纔除御史者旋授外藩賓佐復有以
私故細事求假外拜州郡無參謁之儀出入失風憲
之體漸恐四方得以輕易百辟無所準繩請自今藩
鎮幕僚勿得任臺官雖親王宰相出釐雜務詔惟辟
召入幕如故餘從其請復抗表求侍養改戶部侍郎
衍又堅乞罷免詔書褒許卽與其母東歸漢乾祐末
丁憂服除詔鄆州高行周津遣赴闕衍辭以足疾不
至周廣順初起爲尚書右丞俄充端明殿學士太祖
征兗州駐城下遣衍往曲阜祠文宣王廟城平以衍
權知州事歸朝權知開封時王峻持權衍與陳觀俱
爲峻所引用會峻敗觀左遷衍罷職守兵部侍郎顯
德初上表求解官授工部尚書致仕還鄉里臺閣縉
紳祖餞都門外冠蓋相望時人榮之建隆三年春卒
子家年七十四衍守章句無文藻然諒直孝悌爲時
所推

劇可久字尚賢涿州范陽人沉毅方正明律令與馮
道趙鳳爲友後唐同光初鳳薦於朝補徐州司法以

幹職聞召爲大理評事賜緋踰年遷大理正坐誤治
獄責授登州司戶遇赦召爲著作卽仕晉歷殿中少
監太子右諭德大理少卿賜金紫晉祖崩可久方在
病告有司糾以不赴國哀坐免未幾復官遷大理卿
周廣順初改太僕卿復爲大理卿會鄭州民李思美
妻詣御史臺訴夫私鬻鹽罪不至死判官楊瑛寘以
大辟有司攝治瑛具伏可久斷瑛失入減三等徒
二年半宰相王峻欲殺瑛召可久謂之曰死者不可
復生瑛枉殺人其可恕耶可久執議益堅瑛得免死
由是忤峻改太僕卿分司西京顯德三年所舉官犯

賊可久坐停任明年復起爲右庶子世宗以刑書深
古條目繁細難於檢討又前後敕格重互亦難詳審
於是中書門下奏曰伏以刑法者御人之銜勒救弊
之斧斤有國家者不可一日而廢也雖堯舜之世亦
不能捨此而致治今奉制旨刪定律令有以見明罰
敕法之意也竊以朝廷之所用者律十二卷律疏三
十卷式二十卷令三十卷開成格一十卷大中統類
一十二卷後唐以來至漢末編敕三十三卷及國朝
制敕等律令則文辭古質或難以詳明格敕則條目
繁多或有所疑誤將救舞文之弊宜伸畫一之規所

冀民不陷刑吏有所守臣等商議望準制旨施行仍命侍御史知雜事張湜太子右庶子劇可久殿中侍御史率汀職方郎中鄧守中倉部郎中王瑩司封員外郎賈玘太常博士趙礪國子博士李光贊大理正蘇曉太子中允王伸等十人編集新格勒成部秩律令之有難解者就文訓釋格敕之有繁雜者隨事刪削其有矛盾相違輕重失宜者盡從改正無或拘牽候畢日委御史臺尚書省四品以上及兩省五品以上官參詳可否送中書門下議定從之自是湜等於都省集議刪定仍令大官供膳五年書成凡三十卷

目曰刑統宰相請頒天下與律疏令式並行可久復拜大理卿建隆三年告老改光祿卿致仕卒年七十七可久在廷尉四十年用法平允以仁恕稱

趙逢字常夫媯州懷戎人性剛直有吏幹父崇事劉守光爲牙校後唐天祐中莊宗遣周德威平幽州因誅崇逢尚幼德威錄爲部曲令與諸子同就學及德威戰沒胡柳陂逢乃游學河朔間久之西遊客鳳翔李從曦門下從曦卒侯益領節制逢又依之漢乾祐中益入爲開封尹表逢爲巡官逢不樂乃求舉進士是歲禮部侍郎集賢殿學士司徒翊典貢舉擢登甲

科解褐授祕書郎直史館周廣順中歷左拾遺右補
闕皆兼史職世宗嗣位遷禮部員外郎史館脩撰顯
德四年改膳部員外郎知制誥逾年轉水部郎中仍
掌誥命恭帝即位賜金紫宋初拜中書舍人太祖征
澤潞逢從行次河內聞李筠擁兵入寇又慮太行艱
險乃妄言墜馬傷足留於懷州駕還京有密旨除拜
逢當草制又稱疾不入太祖謂宰相曰此人得非規
避行役者耶對曰誠如聖言遂貶房州司戶會恩量
移汝州司馬乾德初召赴闕授都官郎中知制誥充
史館脩撰判館事二年改判昭文館未幾充樞密直

學士加左諫議大夫蜀平出知閬州時部內盜賊攻
州城逢防禦有功賊既平誅滅者僅千家妻朱氏病
死京師詔給葬事代還遷給事中充職六年權知貢
舉太祖征太原以逢爲隨軍轉運使鑄印賜之會發
諸道丁壯數十萬築堤壅汾水灌晉陽城逢白太祖
乞效用即命督其版築時方盛夏逢於烈日中親課
力役因而遘疾輿歸京師開寶八年卒逢揚歷清近
所至有聲然傷慘酷又言多詆訐故縉紳目之爲鐵
檠大中祥符二年特詔錄其子極爲三班借職
蘇曉字表東京兆武功人父瓚仕後唐歷祕書少監

長興初曉辟鄧州從事漢祖鎮太原表爲觀察支使
周廣順初由華州支使入爲大理正以讞獄有功遷
少卿顯德中歷屯田郎中宋初詔與竇儀奚嶼張希
讓等同詳定刑統爲三十卷及編敕四卷建隆四年
權大理少卿事遷度支郎中乾德三年出爲淮南轉
運使建議權斬黃舒廬壽五州茶置十四場規其利
歲入百餘萬緡開寶二年遷司勳郎中改西川轉運
使仍掌京城市征先是朝廷遣供備庫事李守信市
木秦隴間守信盜官錢鉅萬旣受代爲部下所發守
信至中牟自剄於傳舍太祖命曉案之逮捕甚衆右

拾遺通判秦州馬適妻李即守信息女守信嘗用木
爲筏以遺適曉得守信所送書以進太祖將捨之曉
上章固請寘于法仍籍其家餘所連及者多至破產
盡得所隱沒官錢擢拜曉右諫議大夫判大理寺賜
金紫遷左諫議大夫七年監在京商稅九年六月卒
年七十三曉深文少恩當時號爲酷吏及卒無子有
一女甚鍾愛亦先曉卒人以爲深刻所致

高防字脩已并州壽陽人性沉厚守禮法累世將家
父從慶戍天井關與梁軍戰死防年十六護柩以歸
事母孝好學善爲詩初張從恩爲北京副留守奏攝

太原府倉曹掾從恩移澶州防禦使表為判官有親
校段洪進盜官木造噐市取其直從恩聞之怒將殺
之洪進懼思緩其罪給曰判官使為之從恩召防詰
之防即引伏洪進得免從恩遺防錢十千馬一疋遣
之防拜受而去終不自明既而悔之命騎追及防不
得已而還賓主如初又居帳下歲餘稍稍有言防自
誣以活人從恩益加禮重從恩入為樞密副使防授
國子監丞從恩留守西洛又為推官召拜殿中丞充
鹽鐵推官以母憂去官服除隨從恩歷鄆晉潞三鎮
判官契丹入汴晉主北行從恩欲歸欵契丹召拜計

議防為陳逆順請固守臣節為左右所挫從恩不用
其言遂歸契丹既行命副使趙行遷知留後從恩所
親王守恩為巡檢與防同領郡事防與守恩謀誅行
遷以城歸漢祖漢祖召防赴太原加檢校金部郎中
乾祐初授屯田員外郎改浚儀令時楊邠用事與防
有隙未幾免職居數月夢一吏以白帕囊印自門入
授防防寤而思曰白主刑吾當為主刑官乎俄而周
祖即位起為刑部員外郎吏齎印至一如夢中所覩
改開封令遷本府少尹除刑部郎中宿州民以刃殺
妻妻族受賂偽言風狂病瘖吏引律不加考掠具獄

上請覆防云其人風不能言無醫驗狀以何為證且
禁繫踰旬亦當湏索飲食願再効必得其情周祖然
之卒寘於法世宗升京判官崔頌忤旨簡求僚佐宰
相首以防薦周祖曰朕方欲用之乃以防代頌世宗
即位拜左諫議大夫賜金紫鞍勒馬顯德二年遷給
事中從征淮南初下秦州即命防權知州事兼判海
陵監事會吳師空廼遷州民入牙城分兵固守以俟
外援俄而揚師韓令坤馳騎召防吳軍復至廣陵防
與令坤敗之詔書嘉獎三年改左散騎常侍其秋召
歸闕復歷知蔡宋二州再從世宗南征判行泗州及

城降命防知州事復知蔡州五年遷戶部侍郎世宗
謀取蜀以防為西南面水陸轉運制置使屢發芻糧
赴鳳州為征討之備太祖還自陳橋防所居為里民
所略詔賜綾絹衣服衾裯鞍馬及征李筠防又為潞
州東北路計度轉運使澤潞平拜尚書左丞賜銀器
綵帛鞍勒馬建隆二年出知秦州州與夏人雜處罔
知教養防齊之以刑舊俗稍革州西北夕陽鎮連山
谷多大木夏人利之防議建採造務闢地數百里築
堡要地自渭而北夏人有之自渭而南秦州有之募
卒三百歲獲木萬章夏部尚波千等率諸族千餘人

涉渭奪木筏殺役兵防出與戰俘四十七人以獻太祖慮擾邊郡詔諭酋帥賜所獲之俘錦袍銀帶以遣之遂罷採木之後命吳廷祚為節度以代防歸為樞密直學士復出知鳳翔乾德元年卒年五十九太祖甚悼惜賜其子太府寺丞延緒詔曰爾父有幹蠱之才懷匪躬之節朕所毗倚遽茲淪亡聞之盡傷不能自已矧素尚清白諒無餘資殯殮所須特宜優恤今遣供奉官陳彥珣部署歸葬西洛凡所費用並從官給

馮贛字禮臣齊州歷城人性便佞任數務巧進父知兆後唐司農卿璿以蔭補解褐授秘書省校書郎遷著作佐郎出為諸城令歲滿授太子右贊善大夫漢初改監察御史周廣順元年遷殿中侍御史河陽判官宋仁範與洛陽嫠婦交訟詔璿劾之獄成大理斷以官當徒追兩官告身刑部員外郎張處素覆核無異奏行仁範詣闕訴其事詔還一官璿洎處素俱坐降一階顯德初遷刑部員外郎充三司判官歲餘改祠部郎中充集賢院直學士宋初轉兵部郎中加金紫階璿風神俊爽善談論有吏材太祖甚寵之擢拜左諫議大夫出知舒州境內有菰蒲魚鱉之饒居民

採以自給防禦使司超盡征之瓚奏奪民利請蠲除
從之建隆四年春徙知廬州乾德三年以本官充樞
密直學士時劔外初平卒有亡命者散匿為盜命瓚
知梓州無何蜀軍校上官進率亡命三千餘人掠民
數萬夜攻州城瓚曰賊乘夜奄至此烏合之衆以箠
挺相擊必無固志正可持重以鎮之旦自潰矣城中
止有雲騎兵三百令分守城門瓚坐城樓密令促其
更籌未夜分擊五鼓賊悉遁去因縱兵追之擒上官
進斬於市誘其餘黨千餘人並釋其罪境內獲安初
太祖欲任用瓚常與趙普言瓚有奇材普忌之乃遣

詣蜀平寇潛令所親信從其行密察其過卽亡入京
師擊登聞鼓訟瓚及監軍綾錦副使李美通判殿中
侍御史李檝受財為姦事急召歸闕親問之詞理屢
屈乃舊吏旣而普遣人至潼關閱其囊裝得金帶玦
玩之物皆封題將以賂劉整整方在太宗幕府瓚具
伏普言法當究太祖欲貸之普固執不可乃削去名
籍瓚流登州沙門島美配隸通州海門島整免所居
官李檝者嘗與王德裔佐王饒幕太祖納孝明皇后
因識之德裔輕率而檝謹厚太祖薄德裔而厚檝至
是檝特免配流未幾復為御史瓚在海上凡十年不

得召開寶末遇赦放還太宗卽位授左贊善大夫太平興國元年冬與禮部員外郎賈黃中左補闕程能分掌左藏三庫先是貨銀與金帛通至是以帑藏充溢乃命分之二年復賜金紫明年判大理寺改度支判官遷秘書少監充職四年上親征太原以瓚爲隨駕三司判官凱旋改大理卿兼判秘書省以足疾求解優詔免朝請令於本司視事瓚抗章請退除給事中致仕復舊勳階五年卒年六十七子克忠至內殿崇班閣門祗候

邊翊字待價華州鄭人也曾祖頡石泉令祖操下邳令父蔚太常卿翊晉天福六年舉進士解褐祕書省校書郎直洪文館漢乾祐初爲右拾遺加朝散大夫澤州饑奉詔視民田周廣順元年遷右補闕三年轉起居舍人顯德二年改庫部員外郎丁外艱服闕授職方員外郎知通州翊課鬻鹽於狼山歲增萬餘石宋初詣衛州視秋稼及掌京倉建隆二年兄玠自河南令入爲吏部員外郎復改翊爲洛陽令兄弟迭尹赤邑時人榮之乾德初召爲倉部郎中蜀平命翊知三泉縣開寶初遷職方郎中監京兆麴務又掌永安軍權貨奏徙務揚州有富民訴廣陵尉謝圖殺其父

本部收尉囚之官吏推劾累三百日獄未具州以狀聞詔珣叅鞫盡得其實乃富民以私憾誣告尉卽反坐之就命權知州事仍兼權貨務罷郡又兼掌酒稅鹽礬務未幾丁母憂起復知州事會征江表兼領淮南轉運使金陵平知江北諸州轉運事太宗卽位遷吏部郎中召還賜金紫充廣南轉運使初至桂州守張頌卒頌濰州人藁葬城外舊制不許以族行僕人乃分匿其家財珣召官吏悉追取之部送其柩歸濰州又屬郡守與護軍有忿隙者但奏令易地不致之於罪釁太平興國五年代歸拜右諫議大夫領吏部

選事七年移知開封府明年夏卒年六十三珣精力有吏材帝方欲倚用及聞其卒歎惜數四賻其家絹四百匹錢二十萬珣一子早卒以其從子俊爲尉氏主簿兄玗至金部郎中弟玢右贊善大夫從子倣至殿中丞倚爲比部員外郎

王明字如誨大名成安人晉天福中舉進士不第驍騎將藥元福爲原州刺史辟爲從事馮暉節制靈武表爲觀察巡官周廣順初元福領陳州防禦使奏署判官會劉崇寇晉州命元福將兵援之事多咨於明先是州縣吏部送丁壯餉糧一多夫盡遁去元福怒

盡驅官吏出軍門將就戮明馳往止之入白元福曰
今軍儲無闕丁夫數萬人文吏儒不能制斬之何益
不如寬以待之賊敗凱旋公無專殺之名不亦善乎
元福感悟盡免其死既而崇衆宵遁即命元福爲建
雄軍節度留鎮因奏署明爲書記賜緋魚顯德初元
福移鎮陝恃功多驕恣明以直道規之忤其左右多
毀明於元福元福亦稍踈之明以父病求歸省元福
數召明明因謝絕之詣闕上書求任州縣歷清平郾
城二縣令宋初荆南高繼冲入覲授彭門節鉞以明
爲武寧軍節度掌書記乾德初召公卿近臣各舉清

白有吏幹者一人給事中馬士元以明塞詔召爲左
拾遺蜀平選知榮州代歸遷右補闕會用兵於嶺南
選爲荆湖轉運使開寶三年大舉南征以明爲隨軍
轉運使山路險絕舟車不通但以丁壯數萬人轉運
供億不闕每下一郡一城必先保其簿書守其倉庫
旣而賀州未下明入與主帥計曰當急取之恐援兵
至則我師勝負未可知諸將頗猶豫明乃擐甲胄率
所部護送輜重卒百人擁丁夫數千畚鍤皆作堙其
塹直抵城門城中懼開門納欵遂據有之因抵廣州
賊衆十餘萬拒戰是夕大風發屋折木衆乃驚懼明

與都部署潘美等謀命丁夫數千人持二炬間道先搗賊壘大軍蓐食陣以待之俄而萬炬皆發焚其柵賊驚果來犯大軍因逆擊之賊大敗斬首數萬劉錕以城降廣州平爲本道轉運使太祖嘉其功擢授祕書少監領韶州刺史充轉運使俄以潘美尹崇珂爲嶺南轉運使以明爲副使明偏歷部內視民疾苦舊無名科歛悉條奏除之嶺表遂安七年代歸帝召見勞問賜襲衣金帶鞍勒馬是歲將用師南唐以明爲黃州刺史帝密授成筭明旣視事即完葺城壘訓練士卒衆莫解其意俄而王師自荆渚乘戰艦而下

即以明爲池州至岳州江路巡檢戰擢都部署擊鄂州軍於江南斬首三百級又破萬餘人於武召殺江南軍七百人拔樊山砦破江州軍斬首三千級又破江南軍三百人於江中獲船十餘艘又擊敗湖口軍萬餘衆奪戰艦五百艘時南唐將朱令贇自上江領衆十五萬連大艦沿流而下將焚采石浮梁抵金陵爲援明率所部舟師屯獨樹口遣其子馳奏請添造戰艦三百艘▲贇令贇帝曰非應急策也令贇朝夕至金陵之圍解矣乃密遣人諭明令樹長木於洲浦間若帆檣之狀令贇望見之果疑大軍襲其後逗撓

不敢進明移檄諸軍相爲犄角因督兵權襲之至小孤山與諸軍合勢大破之擒令贄衆赴水死者十五六金陵平詔明安撫諸郡因命知洪州太宗即位兼領江南諸路轉運使召爲右諫議大夫充三司副使太平興國七年與侯陟同判三司事八年召分三司各命使領之改左諫議大夫爲鹽鐵使遷給事中雍熙四年改光州刺史出知并州端拱元年代還表求換秩改禮部侍郎會契丹擾邊詔以明知真定府契丹遁去淳化初昭歸闕知京朝官差遣事二年卒年七十三子挺扶並進士及第歷臺省累爲轉運使皆

知名挺至殿中侍御史扶嘗直集賢院至工部員外郎景德中錄幼子揆爲光祿寺主簿大中祥符八年又錄其孫師顏爲三班借職揆至殿中丞

許仲宣字希粲青州人漢乾祐中登進士第時年十八周顯德初解褐授濟陰主簿考功員外郎張乂薦爲淄州團練判官宋初赴調引對便殿仲宣氣貌雄偉太祖悅之擢授太子中允受詔知北海軍仲宣度其山川形勢地理廣袤可以爲州郡因畫圖上之遂升爲濰州初議建牧馬監令仲宣行視諸州頗得善地從征并門掌給納四十餘州資糧悉能集事帝益

知其疆幹開寶四年知荆南轉運事及征江南又兼南面隨軍轉運事兵數十萬供饋無闕南唐平以漕輓功拜刑部郎中中謝日召升殿獎諭賜緋九年詔知永興軍府事太宗嗣位遷兵部郎中驛召赴闕賜金紫授西川轉運使屬西南夷寇鈔邊境仲宣親至大度河諭以逆順示以威福夷人率服會言事者云江表用兵時仲宣乾沒官錢召還令御史臺盡索財計簿爲校凡數年而畢無有欺隱改廣南轉運使會征交州其地炎瘴士卒死者十二三大將孫全興等失律仲宣因奏罷其兵不待報即以兵分屯諸州開

庫賞賜草檄書以諭交州交州即送款內附遣使修貢仲宣復上章待罪帝嘉之太平興國六年冬南郊畢遷吏部郎中八年與膳部郎中知雜滕中正兵部郎中劉保勳刑部郎中辛仲甫皆以久次郎署擢陞諫垣仲宣爲左諫議大夫未幾召還以本官權度支雍熙四年出知廣州未上移知江陵府俄改河南府端拱中遷給事中淳化元年卒年六十一仲宣性寬恕倜儻不檢有心計初爲濟陰主簿時令與簿分掌縣印令畜嬖妾與其室爭寵令弗能禁嬖欲陷其主竊取其印藏之封識如故以授仲宣翌日署事發匣

則無其印因逮捕縣吏數輩及令簿家人下獄鞫問果得之於令舍竈突中令聞之倉皇失措仲宣處之晏然人服其量嘗從征江南都部署曹彬令取陶器數萬給士卒為燈具仲宣已預料置奉之如其數其才幹類此子待用至國子博士待問再舉及第至殿中丞待旦至比部員外郎待用子巨源亦登進士第楊克讓字慶孫同州馮翊人高祖公略洪州都督晉末舉進士不第州將劉繼勳辟為戶曹掾漢乾祐中本府節度張彥成表授掌書記周廣順初彥成移鎮安陽穰下克讓以舊職從行彥成入為執金吾病篤

奏稱其材可用克讓以彥成死未葬不忍就祿退居別墅俟張氏子外除時論稱之歷鎮寧軍掌書記顯德二年調授鳳翔府司錄參軍加兼監察御史以祖母老解官歸養未幾改延州觀察推官與通判宋琪並為節度使趙贊所禮累加朝散大夫兼殿中侍御史連以家難去職太祖素知其名會贊入覲復稱其才即起為左補闕掌斬口權貨務乾德六年知果州上言願畢襄事特賜緡錢許葬畢赴任開寶三年就命為西川轉運副使蜀民懷其善政璽書褒美代歸闕下疏民利病十事稱旨太祖召升殿賜坐勞問面

賜金紫將大用為侯陟所沮事見陟傳征南唐命克讓知昇州行府昇州平就知州事兼水陸計度轉運使事加兵部員外郎太平興國初就加刑部郎中知大名府會錢俶陳洪進來歸疆土以克讓為兩浙西南路轉運使泉州民嘯聚為盜克讓在福州即率其屯兵至泉州與王明王文寶共討平之四年徙知廣州俄兼轉運市舶使明年卒年六十九克讓少好學手寫經籍盈於篋笥多收圖畫墨跡歷官庶謹幹局所至有聲每視事自旦至暮或通夕斷決如流無有凝滯當時稱為能吏子希閔字無間生而失明令諸

弟讀經史一歷耳輒不能忘屬文善緘尺趙普守西洛府中牋疏皆希閔所為將奏署本府掾固辭不受普優加給贍張齊賢李沆薛惟吉張茂宗繼領府事皆優待之卒年三十九有集二十卷自教三子日華日嚴日休皆登進士第日華都官員外郎日嚴職方員外郎日休殿中丞希閔弟希雨淳化三年進士至屯田員外郎從子日宣亦登進士第

段思恭澤州晉城人曾祖約定州司戶祖昶神仙令父希堯晉祖鎮太原辟為從事與桑維翰同幕府晉有天下希堯累歷清顯思恭以門蔭奏署鎮國軍節

度使官天福中希堯任棣州刺史兼權鹽筴制置使
思恭解官侍養奉章入貢改國子四門博士賜緋開
運初出爲華商等州觀察支使劉繼勳節制同州辟
爲掌書記繼勳入朝會契丹入汴軍士誼譟請立思
恭爲州帥思恭諭以禍福拒而弗從乃止漢祖建國
授左補闕隱帝時蝗詔徧祈山川思恭上言赦過宥
罪議獄緩刑苟獄訟平允則災害不生望令諸州速
決重刑無致淹濫必召和氣從之歷度支駕部周顯
德中定濱州田賦世宗嘉之賜金紫丁外艱服闕拜
左司員外郎建隆二年除開封令遷金部郎中乾德

初平蜀通判眉州時亡命集衆攻通州城刺史趙廷
進懼不能敵將奔嘉州思恭止之因率屯兵與賊戰
彭山軍人皆觀望無鬪志思恭募軍士先登者厚賞
於是諸軍賈勇大敗賊思恭矯詔以上供錢帛給之
後度支請按其罪太祖憐其果幹不許令知州事丁
母憂起復俄召爲考功郎中知泗州會馮繼業自靈
州舉宗來朝帝以思恭代知州事仍語之曰馮繼業
言靈州非術霍名將鎮撫之不可汝其往哉思恭曰
臣奉詔而往必能治之帝壯之賜窄衣金帶錢二百
萬仍以塗涉諸部令別齎金帛以遺之思恭下車矯

繼業之失綏撫夷落訪求民病悉條奏免之俄而回
鶻入貢路出靈州交易於市思恭遣吏市硃砂吏爭
直與之競思恭釋吏械其使數日賞之使還愬其主
復遣使齎牒詣靈州問故思恭理屈不報自是數年
回鶻不復朝貢久之遷右諫議大夫知揚州朝廷方
經略江表命思恭兼沿江巡檢每出巡委州事於通
判以牌印鼓角金鉦自隨驛書自京師來者令齎至
其所事多稽滯因與通判李崇相告訐詔以屬吏思
恭辭不直責授太常少卿改知宿州太宗即位遷將
作監知秦州坐擅借官庫銀造器又妄以貢奉為名

賤市狨毛虎皮為馬飾為通判王廷範所發降授少
府少監知邢州太平興國六年遷少府監雍熙元年
南郊畢表乞復舊官再為右諫議大夫二年知壽州
端拱初遷給事中尋知陝州淳化三年卒年七十三
思恭以門資歷顯官不知書無學術然踐更吏事所
至亦著勤績子惟一至太常博士三司度支判官從
子惟幾第進士仕至兵部員外郎

侯陟淄州長山人漢末舉明經周廣順初試校書郎
為西州回鶻固信使判官還補雷澤主簿司門員外
郎姚恕凡四薦陟為襄城令汝州防禦判官濮陽襄

邑令建隆初爲寃句令以清幹聞二年擢爲左拾遺
仍知縣事節度袁彥頗爲不法陟抗章言之彥上表
謝自陳無罪太祖亦不窮治四年令兼領本縣屯兵
俄改淮南轉運使賜緋衣黑銀帶遷右補闕乾德三
年就改侍御史明年入爲左司員外郎度支判官朝
議欲以本官領省事改度支員外郎依前充判官開
寶五年復爲左司員外郎六年權判吏部銓俄賜金
紫十二月詔與戶部員外郎知制誥王祐等同知貢
舉未鎖宿出知揚州會出師收金陵陟以所部敗南
唐軍千人於宣化城俄爲部下所訟追赴闕陟度理

窮乃求哀盧多遜多遜素與陟善爲其畫計時江表
未拔太祖厭兵南土暑熾軍卒疫死方議休兵以爲
後圖陟適從揚州來知金陵危甚多遜令上急變求
見陟時被病令掖入卽大言曰南唐平在朝夕陛下
奈何欲班師願急取之臣若誤陛下願夷三族上屏
左右召升殿問狀遂寢前議並赦陟罪復知吏部選
事太平興國初遷戶部郎中俄而選人有妄冒事發
詞涉於陟南曹雷德驤將奏劾之陟造便殿自首出
爲河北轉運使征太原爲太原東路轉運使駕還次
鎮州命先還上都供頓軍需以功遷左諫議大夫權

御史中丞事五年同知貢舉開寶末趙普在中書陟
嘗上疏言其短至是普再入相陟頗憂恚六年南郊
畢加給事中七年三司使王仁贍左降以陟與王明
同判三司八年卒贈工部尚書陟有吏幹性狡獪好
進善事權貴巧中傷人太祖嘗召刑部郎中楊克讓
命坐與語且諭以將大用陟素忌克讓偵知之因奏
事上問識楊克讓否陟曰臣與克讓甚善知其人才
誠朝廷佳士也近聞其自言上許以大用多市白金
作飲器以自奉臣頗怪之上怒亟令克讓出典郡其
險詖如此

李符字德昌大名內黃人漢乾祐中郭從義討趙思
綰於京兆辟符在幕府表爲京兆府戶曹掾歷郿縣
主簿保義軍節度推官丁內艱服除調汝州防禦判
官權知州事右庶子楊恪薦爲大理正乾德中知歸
州轉運司制置歸朝以京西諸州錢帛不登選知京
西南百轉運事奏便宜百餘條凡四十八事命著爲
令賜緋魚因奏對稱旨遷起居郎後荆湖轉運許仲
宣隨軍討南唐詔符赴荆湖調發芻糧符領船數千
艘順流而下事畢賜金紫符又建議鑿橫江河以通
漕運發和州三縣丁壯給其役太祖欲幸西京有事

于南郊符上書陳八難曰京邑凋弊一也宮闕不備
二也郊廟未修三也百司不具四也畿內民困五也
軍食不充六也壁壘未設七也千乘萬騎盛暑扈行
八也不從禮畢還京改比部員外郎判刑部太平興
國初遷駕部轉祠部郎中知廣州兼轉運使二年符
圖海外諸城及嶺外花木各二以獻在任有善政民
爲立生祠五年召爲右諫議大夫判吏部銓兼大理
寺理三司副使范旻得罪以符代之賜白金三千兩
車駕幸大名領行在三司未幾坐與官屬競課最罷
職守本官七年春開封尹秦王廷美出守西京以符

知開封府廷美事發太宗令歸第省遇趙普令符上
言廷美在西洛非便恐有他變宜遷遠郡以絕人望
遂有房陵之貶普恐泄言坐符用刑不當貶寧國軍
行軍司馬盧多遜貶崖州也符白普曰珠崖雖遠在
海中而水土頗善春州稍近瘴氣甚毒至者必死願
徙多遜處之普不荅先是太宗尹京符因宋琪薦彌
德超事藩邸符貶德超爲樞密副使屢稱其冤會德
超以事貶帝惡其朋黨徙符嶺表普移符知春州至
郡歲餘卒年五十九符無文學有吏幹好布人主意
以求進用終以此敗至道二年郊祀追復右諫議大

夫大中祥符五年錄其子璜試將作監主簿

魏丕字齊物相州人頗涉學問周世宗鎮澶淵辟司
法參軍有盜五人獄具丕疑其寃緩之不數日果獲
真盜世宗嘉其明慎歷頓丘冠氏元城三縣令世宗
卽位改右班殿直自陳本以儒進願受本資官世宗
曰方今天下未一用武之際藉卿幹事勿固辭也未
幾出監明靈砦軍世宗征淮甸丕獲江南謀者四人
部送行在詔獎之賜錢十萬遷供奉官供備庫副使
太祖卽位改作坊副使時楊承信帥河中或言其反
側未安命丕賜承信生辰禮物陰察之還言其無狀

太祖嘗召對語丕曰作坊久積弊爾爲我修整之丕
在職盡力以久次轉正使開寶九年領代州刺史凡
典工作十餘年討澤潞維揚下荆廣收川峽征河東
平江南太祖皆先期諭旨令修剏器械無不精辦舊
床子弩射止七百步令丕增造至千步及改繡衣鹵
簿亦專敕丕裁製丕撤本坊舊屋爲舍衢中收僦直
及鬻死馬骨歲得錢七千餘緡工匠有喪者均給之
太祖幸洛郊祀三司使王仁瞻議僱民車牛運法物
太祖以勞民不悅召丕議之丕請揀本坊匠少壯者
二千餘分爲遞舖輸之時以爲便雍熙四年代郝正

爲戶部使端拱初遷度支使是冬出爲黃州刺史還朝召對便坐賜御書急就章朱邸集丕退作歌以獻因自述願授臺省之職太宗面諭曰知卿本儒生然清望官奉給不若刺史之優也淳化初改汝州刺史歷知鳳州改襄州境內久旱丕以誠禱之二夕雨露足明年召還屢求退居西洛不許四年表求致仕授左武衛大將軍仍領汝州刺史俄判金吾街仗初六街巡警皆用禁卒至是召左右街各募卒千人優以廩給使傳呼備盜丕以新募卒引對遂分四營營設五都一如禁兵之制五年改領郢州刺史俄改領復

州遷左驍衛大將軍咸平二年卒年八十一丕好歌詩頗與士大夫遊接有時稱南唐主李煜妻卒遣丕充弔祭使且使觀其意趣煜邀丕登昇元閣賦詩丕有朝宗海浪拱星辰之句以風動之太宗嘗賜詩令丕與柴禹錫和焉

董樞真定元氏人後唐大清中以獻書授校書郎累歷賓佐晉天福中爲左拾遺知樞密院表奏周廣順初爲左補闕世宗卽位詔常參宮各奏封事樞上平吳策淮南平遷浚儀令恭帝卽位遷殿中侍御史太祖乾德初遷主客員外郎上書請伐蜀蜀平通判劍

州會全師雄叛攻劔刺史張仁謙足疾不能戰欲棄城走樞固爭戰賊敗之因招餘衆降仁謙飲樞令醉密殺降數百誣奏樞與賊通會中使自成都還備言其事太祖並召之庭辯曲直仁謙遂屈下御史臺鞫之黜宋州敎練使以樞嘗貢西伐計遷比部郎中三年出兼桂陽監使上書請伐廣南詔益桂陽戍卒三千令樞統之開寶二年又上方略命劉鋹令內侍曾居實侵桂陽樞擊退之三年大舉伐鋹令樞率兵趨連口克之改兵部郎中樞知連州兼行營招撫使嶺南平賜錢三百萬四年移知襄州又爲河北轉運使

改判西京留司御史臺初樞罷桂陽監以左贊善大夫孔璘代之璘通三禮嘗講學於河朔擢第歷州縣及升朝蒞桂陽歲滿以太子洗馬趙瑜代之瑜趙州人家世豪右自言諳練邊事開寶中命爲易州通判歲滿移桂陽瑜至卽稱疾遂以著作郎張侃代之侃至月餘奏瑜在任累月得羨銀數千斤雖送官而不能具數聞計樞與璘隱沒可知矣詔下御史案之獄具有司計盜賊法俱當死太祖曰趙瑜非自盜但不能發擗耳樞璘並坐死瑜決杖流海島擢侃爲屯田員外郎

論曰顏衍振舉風憲不避疆禦劇可久居廷尉之任以平允聞趙逢果斷之士而獨尚嚴酷處之要密之職則非所宜蘇曉銳意深刻樂致人罪後嗣衰謝厥報不誣高防陳逆順以聳臣節體明慎而究疑獄治迹清操沒而彌章若其自誣以救人之死古人何加焉馮瓚省關市之苛賦設方略以擊賊功若可稱而巧宦任數竟致傾敗理固然矣邊珣王明許仲宣楊克讓當官效用以清幹稱然仲宣寬簡持重造次不撓蓋人之難能者王明累參戎事預立戰功至若開諭元福止其暴誅此赴蹈之仁也段思恭遏亂兵擊

群寇便宜從事以著奇績斯亦可矣然不能動遵規矩速訟之降者再焉侯陟吏才適用患在忤刻李符博通時務乃事深文以致將荒自弊遂為口實魏丕久典工効以濟戎用至於反寬盜之獄捄揚承信之誣善元可隔董勳謝平口伐蜀及取廣南咸克舉之且多戰功而以貪墨取所借哉

列傳卷第三十

宋史二百七十一

開府儀同三司桂國錄軍國事前中書右丞相兼樞密使領經筵事都總裁臣脫脫等奉
勅脩

馬令琮 杜漢徽 張廷翰 吳虔裕

蔡審廷 周廣 張勳 石曦

張藏英 陸萬友 鮮暉 李韜

王晉卿 郭廷謂 子延濟 從子延澤 趙延進

輔超

馬令琮本名令威避周祖名改之大名人父全節五代史有傳全節歷橫海定遠昭義彰德定武天雄六

節度皆署令琮爲牙校累授彰德牙內都指揮使檢校尚書左僕射領勤州刺史令琮少善騎射嘗從其父平安州及與鎮州安重榮戰皆有功由是知名晉開運二年全節卒令琮起復拜隰州刺史漢祖開國爲西京巡檢使周祖受命改陳州刺史征兗州爲京城四門外巡檢世宗嗣位移隨州顯德二年入爲虎捷左第一軍都指揮使六年兼領建州刺史太祖即位出刺懷州李筠叛將親征召三司張美餉兵食美言河內密邇上黨令琮日夜儲蓄以俟王師太祖善之命授團練使執政言令琮方供億大軍不可移他

郡故升懷州爲團練以令琮充使又充先鋒都指揮使澤潞平爲昭義兵馬鈐轄踰年被疾詔許歸郡乾德元年卒年三十九太祖甚憐之錄其子延恩爲殿直

杜漢徽京兆長安人父阿孫爲太原威勝軍使漢徽有膂力善騎射年十七仕後唐武皇爲廳直隊長天成中累遷護聖軍使晉天福六年與慕容鄴等討安州李金全生禽指揮使孫厚以功遷興順指揮使八年從征鎮州安重榮改護聖指揮使贈阿孫爲左贊善大夫開運二年以所部戍深州破契丹於樂壽殺

獲甚衆漢初從高行周討杜重威於鄴屢爲流矢所
中身被重創猶力戰觀者壯之又率所部戍鎮州破
契丹於靈壽獲車馬甚衆周世宗征劉崇漢徽有戰
功補龍捷左第五軍都虞候移所部屯安平縣破契
丹於縣南獲器甲車帳遷本軍左第四軍都虞候宋
初補本軍都校領茂州刺史改領潮州從平李筠又
從平李重進錄功居多建隆三年出爲天長軍使移
雄武軍使知屯田事是冬被病即以符印授通判宋
鸞請告歸京家人勸其求醫藥漢徽笑曰我在戎行
四十年大小百餘戰不死幸矣安用藥爲未幾卒

張廷翰冀州信都人父慎圖仕周爲兵部郎中廷翰
少慷慨有智畧善騎射晉天福中冀州刺史張建武
召補牙校其後刺史李冲署爲本州牢城軍校契丹
入中原署其黨何行通爲刺史契丹主道殂州人共
殺行通推廷翰知州事漢初就拜刺史廷翰盡捕殺
行通者戮於市爲政寬厚簡易民甚愛之周廣順初
召赴闕周祖見其貌魁偉謂樞密使王峻曰冀州近
邊雖更擇人亦無踰廷翰者即日遣還在郡八年契
丹將高牟翰數擾邊皆爲廷翰擊走廷翰家富於財
歲遣人齎金帛北入市善馬常得數百匹貢獻外悉

遺貴近甚獲美譽顯德中歷棣海沂三州團練使屢
率兵敗淮人移萊州宋初又歷冀亳二州乾德二年
卒年四十七

吳虔裕許州許田人父徽左屯衛將軍虔裕少爲郡
吏漢祖鎮許愛其精謹署以右職及移鎮太原以虔
裕從開國擢爲引進使轉內客省使時鎮州節度劉
在明卒遣虔裕率兵巡護隱帝即位召爲宣徽北院
使周祖討三叛以虔裕爲河中行營都監率護聖諸
軍五千以往李守貞出兵五千餘設梯橋分五路於
長連城西北以禦周祖周祖令虔裕率大軍橫擊之

蒲人敗走奪其梯橋殺傷大半師還賜襲衣玉帶會
樞密使楊邠上言求解職隱帝遣人諭邠曰樞機之
任非卿不可卿何職間離而爲此請耶使至而虔裕
在坐即颺言曰機要重地非可久處俾後來者迭居
可也使還以白帝帝怒出虔裕爲鄭州防禦使乾祐
末誅大臣急詔入朝命將兵守澶州及留子陂戰敗
遂降周祖廣順初遣還賜以襲衣玉帶鞍勒馬從周
祖討慕容彥超破之改汝州防禦使歷右衛左金吾
衛二大將軍兼街仗使太平興國六年遷右千牛衛
上將軍仍判左街仗事虔裕掌金吾三十餘年端拱

初卒年八十八贈太尉虔裕性簡率言多輕肆右金
吾上將軍王彥超告老虔裕語人曰我縱僵仆殿階
下斷不學王彥超七十致仕人傳笑之每朝會及從
遊宴太宗憐其壽高常慰撫之子延彬至儀鸞副使
延彬子仁美至內殿崇班

蔡審廷磁州武安人曾祖凝邢州別駕祖綰武安遠
城三治使父顥洛州長史審廷少能騎射晉初應募
補護聖散都頭周顯德初擢為殿前散員轉鐵騎副
兵馬使從世宗戰高平有功遷軍使太祖為殿前都
點檢從世宗征淮南審廷隸麾下預戰紫金山攻副

指揮使宋初授殿前散都頭指揮使從征李筠攻澤
州先登為飛石傷足帝賜以良藥美酒及車駕還京
幸其官署問之賜賚甚厚尋轉內殿直都虞候俄改
伴飯都指揮使建隆中領當州刺史兼內外馬步軍
副都軍頭乾德初授冀州刺史征太原時為北面步
軍都指揮使屯兵易州審廷訓練士卒甚整太祖過
鎮陽見於行在所賜名馬寶劍命為鎮州兵馬都鈐
轄開寶八年卒年六十九

周廣字大均其先應州神武川人父密事晉歷鄜延
晉三鎮節度使周廣順初至太子太師致仕廣幼從

其父爲牙校漢初授供奉官未幾擢左千牛衛將軍
周祖命將討慕容彥超於兗州以廣爲行營都監賊
平錄功遷右武衛將軍俄改右神武將軍充鎮淮軍
兵馬都監從世宗征淮南既得江北數州即命廣勞
來安集民甚德之因領常州刺史兼內外馬步軍都
軍頭淮南平改眉州刺史宋初授隰州刺史乾德三
年遷潘州團練使令訓練雄武諸營開寶二年從征
太原爲攻城樓櫓戰權部部署師還加內外馬步軍
副都軍頭六年改右屯衛大將軍領郡如故太平興
國二年卒

張勳

張勳河南洛陽人晉開運中事留守景延廣爲典客
延廣表爲供奉官周世宗將征淮南以勳爲申州緣
淮巡檢因採光州機事聞于朝廷即命勳率兵同討
平之遂監光州軍充內外巡檢後攻黃州敗吳人於
麻城復破栢業山砦目中流矢遷內園副使及征瀛
莫以爲霸州兵馬都監初征李筠勳從石守信董前
軍拔大會砦及敗筠衆於太行破澤州皆預有功太
祖還京命權知許州未幾李重進叛又詔與石守信
李處耘先率兵進討拔楊州以勳爲兵馬都監遷旣
使討朗陵克前軍兵馬都監荆湖平以功就拜衡

州刺史乾德初克彬州及桂陽監以勲為刺史兼監使五年代歸至揚州卒年六十八太祖甚憐之錄其子廷敏為殿直勲性殘忍好殺每攻破城邑但揚言曰且斬頗有橫罹鋒刃者將赴衡州州民皆涕泣相謂曰張且斬至矣吾輩何以安乎

石曦并州太原人晉祖弟韓王暉之子天福中以曦為右神武將軍歷漢至周為右武衛左神武二將軍恭帝即位初為左衛將軍會高麗王昭加恩命曦副左驍衛大將軍戴交克使建隆三年再使高麗還左驍衛大將軍護泰州屯兵西人犯邊曦率所領擊破

之斬渠帥十三人太祖征晉曦領兵二千人自澤潞除道至太原壅汾水灌其城又益兵千人部攻遼州俄知雄州代為潭州鈐轄開寶八年領兵敗南唐軍二千餘于袁州平梅山板倉渚洞蠻寇俘馘數千人太平興國中歷右神武右羽林大將軍連知孟襄二州遷領誠州刺史雍熙四年改知霸州兼部署會陳廷山謀以平戍軍叛入北邊曦察知之與侯延濟定計禽廷山以獻錄其功加領本州團練使同知鎮州淳化二年移原州遷右龍武軍大將軍被病請告詔特給全俸四年卒年七十四贈賻加等

張藏英涿州范陽人自言唐相嘉貞之後唐末舉族爲賊孫居道所害藏英年十七僅以身免後逢居道於豳州市引佩刀刺之不死爲吏所執節帥趙德鈞壯之釋而不問以補牙職藏英後因居道避地關南乃求爲關南都巡檢使至則微服携鐵棍匿居道舍側伺其出擊之仆於地齧其耳噉之遂禽歸設父母位陳酒餼縛居道於前號泣鞭之齧其肉經三日剝其心以祭卽詣官首服官爲上請而釋之燕薊間目爲報讎張孝子契丹用爲盧臺軍使兼權鹽制置使領坊州刺史周廣順三年率內外親屬并所部兵千

餘人及煮鹽戶長幼七千餘口牛馬萬計舟數百艘航海歸周至滄州刺史李暉以聞周祖頗疑之令館於封禪寺俄賜襲衣銀帶錢千萬絹百匹銀器鞍勒馬數月世宗卽位授德州刺史未幾召歸對便殿詢以備邊之策藏英請以深州李晏口置砦及誘境上亡命者以隸軍願爲主將得便宜討擊世宗悉從之以爲緣邊招收都指揮使賜名馬金帶藏英遂築城李晏口累月募得勁兵數千人會遣鳳翔節度王彥超巡邊爲契丹所圍藏英率新募兵馳往擊之轉戰十餘里契丹解去改濮州刺史仍領邊任契丹將高

牟翰以精騎數千擾邊藏英追擊於胡盧河北自旦
至晡殺傷甚衆值暮收兵契丹遁去後因領兵巡樂
壽契丹幽州驍將姚內斌偵知藏英兵少以精騎二
千陣於縣之北藏英率麾下擊之自辰及申士皆殊
死戰內斌遂解去世宗降璽書褒美征瓦橋關爲先
鋒都指揮使敗契丹騎數百於關北下固安縣又改
關南排陣使宋初遷瀛州團練使并護關南軍建隆
三年卒於治所年六十九孫鑑自有傳

陸萬友蔚州靈丘人少隸太原爲裨校漢祖起義擢
爲護聖指揮使隱帝卽位出爲天雄軍馬軍都指揮

使周祖之起兵也萬友預謀及踐祚擢爲散員都指
揮使領獎州刺史世宗嗣位遷龍捷左第三軍都指
揮使轉控鶴右廂都校領虔州團練使改虎捷右廂
領閬州防禦使恭帝嗣位出爲安州防禦使宋初歷
沂蘄二州防禦使乾德四年改汝州開寶中討南唐
造舟于采石磯以濟師命萬友守之江南平爲和州
防禦使太宗嗣位以爲晉絳等州都巡檢使帝征太
原克汾石二州以萬友爲石州都巡檢使俄兼知江
州移巡警鳳翔秦隴代歸詔知瀛州在郡二年政務
苟簡雍熙二年改右監門衛大將軍充河陰兵馬都

監逾年卒年七十三萬友始業丐饒既貴達不忘本以銀爲丐饒器數十事示子孫性猛暴以武勇自任所至無善政太宗以其勳舊恩遇不替聘其次女爲許王夫人

解暉洺州臨洺人父珪應募爲州兵後唐天成中西征至劔門沒於陣暉少有勇力以父死戎事得隸兵籍戍鳳門與契丹接戰斬首七級獲酋長一人以功遷奉國軍隊長晉天福中安重榮反鎮州因舉兵向關至宋城晉師逆戰大破之暉募軍中壯士百餘人夜擣賊壘殺獲甚衆暉頻中流矢而怒戰自若顏色

不撓以功遷本軍列校周廣順初劉崇與契丹侵晉州暉從都部署樞密使王峻等往援之暉率敢死士三千餘夜入契丹帳擊之殺獲甚衆遷本軍第五指揮使從世宗征淮南率所部下黃州禽刺史高弼遷虎捷第一軍都虞候宋初步軍都軍頭從征澤州力戰目中流矢師還策勲爲內外馬步軍副都軍頭建隆四年充湖廣道行營前軍戰擢都指揮使潭州平降璽書獎諭僞統軍黃從志據岳州暉率舟師討平之生擒從志及將校十四人俘斬數千溺死者衆改控鶴右第二軍都指揮使領高州刺史乾德六年詔

領所部軍屯上黨從李繼勳略太原開寶九年破太原軍於境上斬首千餘級獲馬三十匹改均州刺史太平興國二年詔於潞州北亂柳石圍中築城名威勝軍以暉爲軍使從征并州與尚食使石彥贇率所部先下隆州殺并州三百餘擒招討使李詢等六人以獻于行在所賜予有加復令與彥贇督戰士隸城西行營分攻太原劉繼元降太宗以太原宮女三人賜暉俄以功遷本州團練使知霸州雍熙初充雲應寰州忻代等州都巡檢使三年代歸本郡淳化二年被病上章告老改右千牛衛大將軍致仕詔未至而

卒年八十暉鷙猛木強每受詔征伐常身先之人所憚者暉視之若甚易由是頻立戰功金創徧體時稱驍將子守顯至內殿崇班閣門祗候

李韜河朔人有勇力膽氣善用稍爲禁軍隊長周祖征三叛韜從白文珂攻河中兵傳其城文珂夜詣周祖議犒軍留韜城下時營柵未備李守貞乘虛來襲營中忽見火發知賊驟至惶怖失據客省使閻晉卿率左右數十人遇韜於月城側謂韜曰事急矣城中人悉被黃紙甲爲火光所照色俱白此殊易辨奈軍士無鬪志何韜憤怒曰豈有食君祿而不爲國致死

耶即援稍而進軍中死士十餘輩隨韜犯賊鋒蒲有
猛將躍馬持戈擬韜韜刺之洞胷而墜又連殺數十
人蒲軍遂潰因擊大破之守貞自是閉壘不敢出俄
驍將王三鐵降城遂平韜由此知名累遷軍校出爲
趙州刺史移慈州乾德六年卒

王晉卿河朔人少勇敢爲鄉里所推周世宗在澶淵
晉卿以武藝求見得隸帳下及即位補東頭供奉官
從戰高平征淮甸每遣宣傳密旨甚親信之洎北征
爲先鋒都監督戰有功詔權控鶴都虞候克關南授
軍器庫使顯德四年爲龍捷右第一軍都指揮使領

彭州刺史恭帝即位出爲濱州刺史乾德中爲興州
刺史四年移漢州時蜀初平寇盜充斥晉卿嚴武備
設方略禽捕剪滅靡有遺漏自是雖劇賊無敢窺其
境然以賄聞太祖惜其才而不問秩滿歸闕以疾求
願養改左監門衛將軍奉朝請貢重錦十匹銀千兩
以謝詔不納以其黷貨愧之也未幾詔戍北邊疆場
清肅開寶四年復授莫州刺史在郡謹斥候善撫循
士卒皆樂爲之用邊民安堵六年八月卒年六十七
郭廷謂字信臣徐州彭城人父全義仕南唐爲濠州
觀察使廷謂幼好學工書善騎射補殿前承旨改濠

州中軍使李景每令偵中朝機事入奏全義卒擢莊宅使濠州監軍周世宗攻淮右南人屢敗城中甚恐廷謂與州將黃仁謙爲固禦之計周師遣諜以鐵券及其壘廷謂拒之城中負販之輩率不逞廷謂慮其亡逸籍置大寺遣兵守之給日食俾製防城具隨其所習以故周師卒不得覘城中虛實周師爲浮梁渦口命張從恩焦繼勳守之廷謂語仁謙曰此濠壽之患也彼以騎士勝故利於陸我以舟師銳故便於水今夏久雨淮流汎溢願假舟兵二千斷其橋屠其城直抵壽春仁謙初沮其議不得已從之即輕擢銜枚

抵其橋麾兵斷竿悉焚之周師大衄死者不可計焚其資糧而還以功授武殿使周師退保定遠又募壯士爲負販狀入定遠偵軍多寡及守將之名還曰武行德周務勅也廷謂曰是可圖也又籍鄉兵萬餘洎卒五千日夕訓練依山銜枚設伏以破之周師大潰行得單騎脫走時有以玉帛子女餉廷謂者悉拒之唯取良馬二百匹以獻以功爲滁州刺史上淮巡檢應援兵馬都監及紫金山之戰南唐諸將多歸降者獨廷謂以全軍還守濠州追不能及時濠守欲棄城走廷謂止之俄加本州團練使繕戈甲治溝壘常若

敵至是秋周師復至表于景請援且言周兵四臨乞
卑辭請和以固鄰好夜出敢死士千餘襲周營焚頭
車洞屋周師蹂躪死者甚衆旣而援兵不至周師急
擊廷謂集諸軍壘門之外南望大慟而降于周至山
陽見世宗特加宴勞賜金帶襲衣良馬器皿拜亳州
防禦使以其弟本州馬步都校廷讚爲和州刺史命
攻天長軍降其將馬贇又爲樓櫓戰櫂左右廂都監
俄歸譙郡宋初從征上黨再知亳州乾德二年代還
改絳之防禦使兩川平馮瓚知梓州爲僕夫所訟召
廷謂爲靜江軍節度觀察留後以代之州承舊政有

莊宅戶車脚戶皆隸州將鷹鷄戶日獻雉兔田獵戶
歲入皮革又有鄉將都將鎮將輩互擾閭里廷謂悉
除之開寶五年卒年五十四廷謂性恭謹事母以孝
聞未嘗不束帶立侍子延濬廷謂兄廷諭仕南唐爲
太子洗馬致仕宋初至祕書監廷諭子延澤

延濬字利川幼謙和初廷謂爲靜江軍節度使延濬
爲桂州牙內都指揮使廷謂卒太祖錄延濬爲供奉
官屢使西北宣諭機事太平興國初以內庭宣索及
殿前賜賚移文庫務未有專領之者乃置合同憑由
應命延濬與內藏庫副使劉蒙正掌之又領入作司

及督治汴河雍熙二年改崇儀使詔與翟守素田仁
朗王繼恩往河北分路按行諸州城壘發鎮兵葺之
端拱二年詔建河北方田命延濬等五人共往規畫
會罷其務而止淳化四年李順亂改西京作坊使充
成都十州都巡檢使時成都將陷延濬單騎入城與
郭載議募亡卒退保劔門賊數千來躡其後擊破之
王繼恩率兵至以延濬爲先鋒壕砦使即領兵倍道
先進賊出探騎數十延濬悉禽之盡得賊機事延濬
易旗變號賊不知覺斬關掩入斬千餘級繼恩又請
延濬知漢州州經兵燹解舍橋梁城砦悉毀延濬募

軍民葺之又率州帑以應軍須錄功改洛苑使又命
率兵屯遂州劔門鈴轄轉運使劉錫言其勞詔書嘉
獎真宗初改內園使代還會河朔用兵延濬馳往邊
城按視砦壘咸平二年疾卒子有倫爲供奉官閣門
祇候

延澤字德潤南唐試祕書省正字乾德中四遷著作
佐郎轉殿中丞知建州淳化二年太宗聞延澤泊右
贊善大夫董元亨皆好學博通典籍詔宰相召問經
史大義皆條對稱旨命爲史館檢討歷國子周易博
士國子博士咸平中求休退授虞部員外郎致仕居

濠州城南有小園以自娛其詠牡丹千餘首聚圖籍
萬餘卷手自刊校范杲韓丕皆與之游景德初卒元
亨亦至虞部員外郎嘗續玄門碑誌三十卷

趙延進澶州頓丘人父暉周太子太師暉爲偏將時
趙在禮據鄴延進頗親學嘗與軍中少年入民家競
取財賄延進獨持書數十編以歸同輩哂之漢末暉
領鳳翔節度未赴鎮王景崇據城反命暉爲都招討
使擊之延進年十八屢當軍鋒景崇平延進奉捷奏
以入授鳳翔牙內指揮使領貴州刺史暉徙宋州亦
從爲牙職改領榮州刺史睢陽有盜數百各立酋帥

爲民患延進以父命領牙兵千餘悉禽戮之詔書褒
美丁外艱表求待服既終喪周世宗征淮南延進獻
萬縑以助軍仍請對世宗召見之時延進有從兄爲
虎捷都虞候帳前橫衝指揮使世宗指延進語之曰
爾弟拳勇有謀將授以禁軍大校延進自陳好讀書
不願也翌日授右千牛衛將軍濠州兵馬鈐轄從征
瓦橋關爲隨駕金吾衛仗使宋初遷右羽林軍將軍
濠州都監會伐蜀以襄州當川路津要命爲鈐轄同
知州務蜀平專領郡事漢江水歲壞隄害民田常興
工修護延進累石爲岸遂絕其患入爲兩浙漳泉國

信使開寶二年授方龍武將軍知靈州以母老願留
得權判方金吾街仗使歷知河中府梓相青三州太
平興國中大軍平并州討幽薊皆為攻城八作壕砦
使嘗詔督造礮具八百期以半月延進八日成太宗
親試之大悅又令主城北諸洞子及班師命與孟玄
喆藥可瓊留屯定州遼人擾邊命延進與崔翰李繼
隆將兵八萬禦之賜陣圖分為八陣俾以從事師次
蒲城遼騎全至延進乘高望之東西亘野不見其際
翰等方按圖布陣陣去各百步士衆疑懼略無鬪志
延進謂翰等曰主上委吾等以邊事蓋期於克敵爾

今敵衆若此而我師星布其勢懸纒彼若持我將何
以濟不如合而擊之可以決勝違令而獲利不猶愈
於辱國乎翰等曰萬一不捷則若之何延進曰儻有
喪敗則延進獨當其責於是改為二陣前後相副士
衆皆喜三戰大破之獲人馬牛羊鎧甲數十萬以功
遷右監門衛大將軍知鎮州及代吏民數千守關借
留詔許留一年俄改右領軍衛大將軍出為高陽關
平戍軍都監兼緣邊巡檢改鈐轄知揚州召入授右
屯衛大將軍徙知相州遷右驍衛大將軍改知鄧州
淳化初飛蝗不入境詔褒之還判右金吾街仗事至

道二年拜右金吾衛大將軍咸平二年卒年七十三
贈左武衛上將軍延進姿狀秀整涉獵經史好作詩
什士流以此多之延進妻即淑德皇后之妹故在顯
德興國中頗任以腹心子昂太平興國二年登進士
第至戶部郎中直昭文館

輔超忻州秀容人家世業農超少勇悍有力晉開運
中應募隸澶州軍籍漢乾祐中趙思綰據永興叛周
祖護諸將討之督兵攻城超率驍勇十七人升雲梯
斫北門樓樓壞而入士卒繼進城遂陷以功補小校
顯德中從太祖征淮南常執銳前驅定滁泗破淮陰

下揚州以功轉越騎副兵馬使宋初從平上黨再遷
內直都知太宗卽位以超爲馬軍都軍頭會親征太
原冒矢石攀堞先登身被十三創帝嘉其勇賜錦袍
銀帶帛五十段詰朝再乘城中流矢者八復加厚賜
大舉襲范陽分兵三路超隸偏將米信爲田重進先
鋒取飛狐蔚州遷馬步軍副都軍頭俄出補曹州馬
步軍都指揮使領峯州刺史改樂州召歸轉都軍頭
淳化三年出爲德州刺史坐誣奏使者毆殺驛吏責
授右監門衛將軍領誠州刺史五年復加都軍頭領
澄州刺史真宗卽位加領獎州團練使真拜萊州團

練使以年老願留京師從之景德元年卒年七十七
論曰太祖有天下凡五代之臣無不以恩信結之既
以安其反側亦藉其威力以鎮撫四方故一時諸將
吳虔裕蔡審廷之徒數從征討咸有勞績焉若馬令
琮守河內儲兵食以迎王師解暉擊湖南冒鋒鏑以
禽敵將此忠蓋驍果尤可稱者漢徽之疾危辭藥藏
英之爲親復讐亦皆一節之美惟張勳嗜殺晉卿冒
貨雖立威著勤所不取也

列傳卷第三十

